

**LISAAYA LIE MU
NDAKAANO EMBIA**

by
J.C.Choate

Published by
World Literature Publications
Winona, Mississippi

© Copyright 2001, World Evangelism Publications

1st printing, 5000 copies, 2022 - **Lubukusu**

InDesign Layout: Shane Fisher

Wenceslaus Juma, Peter Khaemba Wekesa and Lawrence Katila

Wenceslaus Juma and Luambo Juma Sindani

Contact: Wenceslaus Juma
(+254)728388958/(+254)733421417
Email: jumawenceslaus@gmail.com

Physical Address:
Kenya, Bungoma county, Kanduyi Sub-County,
Namwacha Village, adjacent to Namwacha Shopping Centre.
Postal Address:
P.O Box 1359, Bungoma, 50200 Kenya

Printed by:
World Evangelism Publications
Winona, MS 38967

Limanyisio

Omukristo khukhwola asaaye Wele. Buli mundu alafukiilila ali lili lirio. Lireeba liboofu biise ebino lili: Omundu khukhwola asaaye ariena? Khukalusia lirebo elino, likhuyiingilila khuche mu Ndakaano Embia. Lilienelio nilio khukhaka khukhola mu masomo kaloondakho. Kaaba noleecha mala weyike ne nafwe, kane ng'ali khunyale khunyoola lisaaya nilio Wele enya khukhwama khwifwe.

Wele kakhuelesia likhuwa liewe ne mala mu likhuwa elio, kekesia lili enya liewe nga ne lili. Elino lili lia ng'ali mu buli siindu nisio akhuboolela, ebele engila eye khuonisibwa, e kanisa, limenya ne likeenda lio Omukristo namwe khusaaya. Khubela kakhwekesia fweesi likhuwa lilala elio, ne likhuwa elino likhwekesia fweesi lili enya liewe lilala elio, lundi khubela Wele alikho alom-aloma khu bulwale bulala busa (bulwale bwe bubwooni), buuli ne kamalesi malala kong'ene (Elomo Endayi eya Kristo), ne lundi khubela aonia boosi mu khufwaanana, abaabo baria ne khuloonda Elomo Endayi eyino, alala ne khutaswa khu kanisa yewe nga Bakristo, akhuboolela khumusaaye. Lili lilayi ne lundi lili enyekha mbo enye fweesi khumusaaye mu ngila ndala---ne mala aakhola ario.

Khwenyekha khuba busa nende lisaaya lilala liong'ene musibala luno, ne elino khukhwola libe nilio Omwami keekesia mu likhuwa liewe. Khunyala khwaba nende abundu akali nio babaandu basaayila ne kakhali, akhaba waena, boosi khukhwola basaaye mu ngila ndala busa. Elino lili mbo, omundu naacha abundu nasilebe niio basaayila mala kabona ne basaaya mu ngila nasilebe, naacha abundu aandi, akhoya anyoole boosi ne basaaya busa mu ngila ndala eyo. Ne, se lili lirio lelo tawe. Sipupu sino sisaaya mungila eyino ne sipupu sisiindi sisaaya mungila eyabukhaane; buli sipupu sisaaya busa mungila yasio. Naanu ano oli owa ng'ali ne naanu owekhikhile? Anaano niio kamaandike kengililamo khukhuyeeta. Khunyala khwamanya busa lisaaya nilio Wele enya aaba ne khucha mu likhuwa liewe. Ne, khulamala khwamanya nilio enya khukhole, khukhoya khwaloonda nga aboolile. Khutasakho, nekhunyoola mulala namwe bakali ne balikho basaaya Wele mu ngila ekhali niyo aana tawe, khukhwola khubalange khuba abo basaaya mu bubeeyi. Nekhusoma mu Barumwa 17, babaandu ba Ateni basaayanga, ne kakhali bakholanga bario bukhamanya niye basaaya tawe. Lundi, Omwami aaloma ali kanyalikhana lisaaya libe lia busa khubela khuloonda kamekisisio ne kamalaka ke babaandu. Elino lili lia ng'aline likila khuloma ne kamaani khuli khulio bnende engila eya ng'ali eye khusaaya nende lundi engila emaayanu

eye khusaaya. Sikila siefwe mu masomo akano sili khunyoola ne khumanya engila eya ng'ali, engila ndala eyo eye khusaaya, ne mala khukhole koosi ke khusaaya khwefwe khuloondekhana nende engila eyo. Kane khukhole khurio nio khuba nende bunyindaafu khuloma khuli khulasaayanga Wele mu roho nende mu bung'ali.

J.C. Choate
Church of Christ
Winona, Mississippi
January 23, 1982

KAALIMO

Lisomo Lia Lulala: Sifuno Sie Khusaaya.....	6
Lisomo Lie Khabili: Oyo Osaaya.....	11
Lisomo Lie Khataru: Esiesio Nisio Khusaaya.....	16
Lisomo Lia Khane: Chingano Che Khusaaya.....	20
Lisomo Lia Kharano: Khusaaya Khwe Bakristo Bataayi.....	25
Lisomo Lia Sita: Endaalo Eye Khusaaya.....	30
Lisomo Lia Saba: Sisiekeshio Sie Khusaaya.....	34
Lisomo Lia Munane: Khukhweyika E Bibilia.....	39
Lisomo Lia Tisa: Lisaba.....	44
Lisomo Lie Khumi: Khukhwimba.....	49
Lisomo Lie Likhumi Na Ndala: Lilikolooya Lio Mwami.....	54
Lisomo Lie Likhumi Na Khabili: Khuaana.....	58
Lisomo Lie Likhumi Na Khataru: Khuucha Mu Liakaanana.....	63

LISOMO LIA LULALA SIFUNO SIE LISAAYA

Likhuwa khusaaya lirumikha mu Bibilia khukhwekesia khukhalaabana, khufumia, liiria, khuelesia luyali, nende khuaana liriana mu khwinaamila. Nio lisaaya libe nende sifuno siosi siosi, lienyebwa liaanwe nende oyoyo omanyana nisio alikho akhola, mungila niyo oyoyo niye asaaya enya. Lekha khulolelesiekho mu likhuwa elino.

1. Khusaaya mu bukhalabani.

Anano, likhuwa elino lili ne sifuno sie khukhalaabanila babaandi, khuaana liiria, khukhola kimilimo, khusaaya, ne kakaandi. E Bibilia ekhwekesia Omwana owa Wele khuba omukhalaabani ne Wele Omwene niye Omwami wewe. Paulo khase na khase elaanga khuba omukhalaabani. Aloma ali, “Paulo omukholi owa Yesu Kristo lundi omurumwa niye Wele arobora ne khulaanga nio elwache Elomo yewe Endayi.” (Barumi 1:1). Petero nende Yakobo bosu baloma bario mu 2 Petero 1:1 nende Yakobo 1:1. Sifuno siabwe sie khuloma bario sili si? Sili mbo baaba biise ebio bakhalaabani bo Mwami mungila choosi, ne lundi baaba balekha koosi nio babe bakhalaabani. Fweesi khwenyebwa khukhola khurio. Paulo akhuchuuba ali, “Ne luno mwakholiilwe balekhuule khukhwama khu bwooni mala muli nasioobi ba Wele. Bukhala bwenywe buli limenya lie khukhwirusia elala khu niye ne ekhumaliilikha wayo buli bulamu bwa mindali.” (Barumi 6:22).

Nio khubone bukhalabani siina nibwo Omwami enya, lekha khubone niko kamaandike akano kaloma: “Mumanyile nga narumikhira Omwami mu khwiboombia khwosi, ne kamasika kamakali. Nakhola kimilimo kiasa nga omukholi owo Mwami mu sinyasio sisianjichakho sikila ekwangwaani eye Bayaudi.” (Barumwa 20:19). “Okhalekha nisio obukulanga khuba silayi siaba ne lisina libi tawe. Sikila bubwami bwa Wele se buli sisiindu sie khulia ne khunywa busa tawe, ne kakhali buli bwe buluungi, kumuleembe, ne kumwikhoyo nikwo Roho Omutakatifu aananga. Ne babaandu ne bakhalaabanila Kristo mu ngila eyino, basiimisia Wele ne khufukiililwa ne babaandi. Nono, khukhwola buli lwoosi khwiluungikhe bibiindu bireera kumuleembe ne biyeeta khukhola omundu okundi abe ne kamaani.” (Barumi 14:16-19). “Khola kimilimo ne kamaani ne mukhaba bakara tawe. Kholela Omwami kimilimo ne kumwoyo kwe khu khweana khukali.” (Barumi 12:11).

Khuloondekhana ne khukhalaabana khwefwe, Paulo aandika ali, “Nono, bawandaayase, sikila siisa sia Wele sikali khwifwe, mwekoonjelela enywe

ndi, yiaana mwabeene khu Wele nga liiosio lie bulamu, liaanwa khu bukholi bwewe lundi limusiimisia niye.” (Barumi 12:1). “Khola kimilimo kienywe nga banasioobi mu busangaafu bulayi bwene nga mulikho mukhalaabanila Omwami se bali babaandu busa tawe.” (Baefeso 6:7). Omwami nalomaloma khu kanisa e Siatira aloma ali, “Ese manyile niko okholanga. Manyile busiime bwowo, lisuubila liowo, bukhalabani bwowo, ne liliefwiilisia liowo. Ese manyile ndi luno okholanga kamakali khukhila mu khunyoa.” (Lifunulwa khu Yoana 2:19).

Khase na khase, khulomalomanga khu liakaanana lie khusaaya Wele mu bukhalabani. Obuno buli bung’ali khubela khuba khulikho khukhalaabanila Wele. Ne mungila ekindi, bulamu bwefwe bwoosi bwenyekha bube bwe khukhalaabanila ne khusaaya Wele. Khunyala khwaba ne lilieyikina lie khusaaya Wele endaalo eye ebweeni eye lichuuma, namwe buli ndaalo eye bulamu bwefwe khuriena kaaba bali se khumuria ne khumukhalaabanila tawe?

2. Khusaaya Omwami mu khumufumia.

Paulo nende Sila ne baaba mu siboe, buloli buboola buli, “Oli embi mu silo akari, Paulo ne Sila baba ne basaba ne khukhwimba kimienya kifumia Wele, baboe babaandi baba barekeeresie.” (Barumwa 16:25). Nalomaloma khu khaba nicho Wele akhuelesia, nende niko Wele enya efwe khumukholele, Paulo aandika ali, “Lekha nono efwe, khukhwaba be khunyoa khu khweyikina mu Kristo, khufumie luyali lwa Wele!” (Baefeso 1:12). Lundi khusoma khuli, “Nono, lekha efwe biise bioosi, khuanenge efuma khu Wele, nga embosio yefwe khubirira mu Yesu, siaanwa sie kiminwa kimwiyamanga niye nga Omwami.” (Baeburania 13:15). Petero aloma ali, “Sifuno siako sili khukhwekesia mbo lisuubila lienywe lili lia ng’ali, bulayi bwene nga ne barechanga eshabu mu mulilo khumanya neli endayi. Khwako lisuubila lienywe lili lie bukusi bukali khukhila eshabu, khukhwola liosi lipimwe, nio liole khukhwikhaliilika. Nio mukhanyoole efuma ne luyali ne lukoosi khu Ndaalo niyo Yesu Kristo alibonekha.” (1 Petero 1:7). “Yesi yesi owilwacha khukhwola elwache nga burume bwa Wele; yesi yesi okholanga kia Wele khukhwola akhole ne kamaani niko Wele amuelesiana, nio mu biindu bioosi efuma yoole khuaanwa khu Wele khubirira mu Yesu Kristu oli ne luyali ne bunyali mindali na mindali.” (1 Petero 4:11).

Khwenyebwa khufumie Omwami buli ndaalo mu bikhola biefwe bioosi, mu koosi niko khukhola nende khuloma. Lukali po, khu ndaalo eye ebweeni eye lichuuma ne khwebuusisye alala khumusaaya, liboofu lili khufumia Omwami. Mu khurakikha, khumufumia mu khwebuusia alala, mala ne khuli

nende sikila silayi mu khwebuusia okhwo, nende mu niko khukhola ne khwebuusisie alala khurio. Kimiooyo kiefwe khukhwola kieboombie, ne, khubirira mu khweyika likhuwa liewe, mu masaba, mu mwienya, nende mu khulia lilikolooya lio Mwami, khumufumia. Khunyala khuriena khwamufumia kaaba bali khuloba khukhola khurio?

3. Khusaaya Omwami mu khumua luyali.

Kristo aaloma ali, “Nio boosi barie Omwana wewe mu ngila ne ng’ene nga barichanga Raraawe. Omundu yesi yesi okharia Omwana tawe, saria Raraawe owamuruma tawe.” (Yoana 5:23). Paulo aandika ali, “Khu Mwami owa mindali, okhanyala afwa tawe, lundi okhabonekha tawe. Wele mulala yeng’ene abe ne lukoosi buli lwoosi! Amina.” (1 Timoteo 1:17).

Omwami niye okhuonia efwe, niye okhua efwe chikhabi, okhua efwe lilieyikina lie limenya lilayi khutumakho, ne lundi Omwami niye owenyekha khunyoola liria liefwe.

4. Khusaaya Omwami mu khumuelesia luyali.

Khuaana luyali khuli khusuta angaaki, khuelesia liiria, khufumia. Eline lili busa liloondekhana nende lisomo liefwe lie khusaaya. Lekha khubonekho niko kamaandike kalomaloma khu likhuwa elino: “Nio enywe mweesi alala mwole khufumia Wele lundi Paapa owo Mwami wefwe Yesu Kristo ne kumumilo mulala.” (Barumi 15:6). “Wele aamukula enywe khu bukusi. Nono, rumikhira kimibili kienywe khulwe luyali lwa Wele.” (1 Bakorinjo 6:20). “Ne kaaba bali oukuumwa sikila oli Omukristo, likhakuambia chisoni tawe, ne kakhali elesia Wele luyali mu lisina elio.” (1 Petero 4:16).

Likhoyela libe liliekoomba liefwe khulolelela khu Wele, khumubalaaya, khumusuta angaaki nende lundi khuelesia lisina liewe luyali. Se khwenyebwa khweelesie fwabene efuma tawe. Ne khwefwaanania khu niye, efwe se khuli sisi sisi tawe. Sifuno siefwe sie khukhwebuusia alala khu ndaalo eye ebweeni eye lichuuma sili khuura kakefwe koosi khu niye, ne mala aba nono khumusaaya.

5. Khusaaya Omwami mu khumwinaamila.

Wele niye omuloongi wefwe ne Kristo ali Omuonia wefwe. Khukhwola khubaelesie liiria. Khukhwola khubarekeeresie. Khukhwola khuloonde niko baboola. Khukhwola khweboombie ebweeni wabwe. Khukhwola khubenaamile. Omwimbi owe chinyimbo aaloma khale ali, “Niye ali omutakatifu lundi owe lisina lie khuriisia lukali.” (Chinyimbo 111:9). Ne, omuandiki

owe Baeburania aaloma ali, “Nono, lekha khuupe orio, sikila khwanyoola bubwami bukhanyala bwasisikhwa tawe. Lekha khuupe orio mala khusaaye Wele mu ngila emusiimisia niye, mu khweboombia ne buri bukali.” (Baeburania 12:28).

Lili busa liong’ene mbo, ne khusiima Omwami, ne khweboombia ebweeni wewe mu khukhola akaako niko aboola, ne lundi, ne khwicha niio ali alala ne khu khuupa orio mu miooyo kiefwe, nio aba khulanyala mu bung’ali khura kimiooyo kiefwe, ne liiba liefwe, ebweeni wewe mu khumusaaya nende khumufumia. Nio aba mu bung’ali khulanyala khubona nilio Paulo aba nalio ne aaloma ali, “Khwako buli siindu nisio mukhola namwe muloma, sikhoya siekholekhe mwisina lio Mwami Yesu, nga ne mupila orio Wele Paapa khubirira mu niye.” (Bakolosayi 3:17).

Babaandu bakali bachichanga khusaaya Wele sikila baanala namwe omundu okundi kabayiingiliile. Bakali bakholanga busa akaako kakholekha mu khusaaya bukhasaaya tawe. Abano nibo babaandu bakhamanya sifuno sie khusaaya tawe, ne mala se silikhoo nisio banyoolangamo tawe.

Mu biise bibiicha, ne khusaaya, lekha khusaaye ne kamaani koosi bukhaba nende kumusilisili tawe, bukhaba nende koosi koosi kamabi kakekisile tawe. Khube nende kimiooyo kimikwalaafu, lundi ne khupila Wele orio. Lekha khuche ebweeni wa Wele mu khumuria nende khumuelesia luyali lwewe, biise ebino nende buli lwoosi, mindali na mindali. Khulamanya khumusaaya nende sifuno sisienyekha, khulachiililila khu khwenya khumusaaya, ne mala khusaaya khwefwe khulaba nende bukhala khwifwe khulikho ne khusaaya nende khu oyo niye khusaaya.

KAMAREBO

1. Aana liboofu lie lisomo elino.
2. Khusaaya nisio siina?
3. Nio khusaaya khube nende bukhala, khukhwola khukholwe khuriena?
4. Likhuwa khukhalaabana lili nende sifuno siina?
5. Omwana owa Wele ali omukhalaabani mungila siina?
6. Paulo, Petero nende Yakobo baaba bakhalaabani?
7. Wele enya bukhalaabani bwa lukano siina?
8. Aanakho kamaandike malala kaloma khu bukhalaabani obuno.
9. Siina sikila ne khulomanga khuli khusaaya khuli bukhalaabani?
10. Khunyala khwasaaya mungila niyo Wele afukiilila kaaba bali se khuria niko aloma tawe?

11. Lomalomakho khu maandike malala kasomia kali khwenyekha khufumia Omwami.
12. Khufumia Omwami mungila siina?
13. Linyalikhana mbo oria Paapa bukharia Omwana tawe?
14. Siina sikila Omwami ne enyekha khuriibwa?
15. Khuaana luyali nisio siina?
16. Liliekoomba liefwe mu bulamu lienyekha libe siina?
17. Lomalomakho khu buleeyi sifuno sikila khwebuusie alala endaalo eye ebweeni eye lichuuma nio khusaaye Wele.
18. Naanu niye owakhuloonga efwe? Naanu niye omuonia wefwe?
19. Khwenyebwa khubakholele abano malala siina?
20. Lisina lia naanu nilio lilienyekha khuriisia lukali?
21. Boola nga Bakolosayi 3:17 ne siboola.
22. Babaandu bakali basaayanga bariena?
23. Khwenyebwa khuche mwisaaya mungila siina?

LISOMO LIE KHABILI OYO OSAAYA

Khu biindu bioosi nibio Wele abuumba, silio busa silala sinyala si-amusaaya, ne esino sili omundu. Wele abuumba omundu ne seli busa nende kumubili kwong'ene tawe ne kakhali nende kumwoyo alala nende kamakesi. Khubela kamakesi akano, omundu anyala khuaana bukhalaki khu likhuwa. Anyala nono arobora khusaaya oyoyo owa mubuumba namwe alekhe. Biise nibio omundu arobora khusaaya Wele, Wele anyoola efuma nende liiria mu bung'ali.

Omundu ali sibuumbe sia Wele sili nende lilienya lie khusaaya. Ne alasaaya sisiindu namwe omundu. Biise bioosi, akholanga ario ne mala lundi acha khuchiililila khukhola ario buli khase. Mu ndaalo chichabira nende echino, omundu amanyiikhe mbo ke naamilanga buli sisiafuma. Bilala khu nibio ke naamilanga bili kumwesi, ching'enieesi, kamabaale, chinjichi, nende aambi buli sisiafuma. Lundi, kainaamila ebio nibio omwene abuumba khukhwama khu mabaale, kimirongoro nende biibia. Ne, kaaba mbo omundu enya asaaye, khukhwola ekesebwe Wele owamuloonga mala aelesebwe kamaani mbo enyekha busa khumusaaya niye yeng'ene. Wele aenjanga babaandu nga babenabo bamusaaye.

Yesu aasomia ali, "Ne kakhali esaa elikho yiicha mala niyo eyino, nimwo abaabo be silukuluku sia ng'ali sie khusaaya Paapa bacha khumusaaya mu roho nende mu bung'ali: khubela Paapa aenjanga bali bario khumusaaya. Wele ali Roho, ne abo bamusaaya khukhwola bamusaaye mu roho ne mu bung'ali." (Yoana 4:23,24). Nono, se lili liliolaana mbo omundu alikho asaaya busa tawe. Kaaba ne enya khusaaya khwewe khufukiililwe, khukhwola khube khuucha khu oyoyo owenyebwa asaaywe ne lundi khube khukhwama mu mwoyo mala lundi khube mu bung'ali. Lekha khwibaasie mala khubone elino lili likhuwa lilienya malala siina.

1. **Babaandu boosi banyala khumanya Wele owa ng'ali mala omenyile**---bioosi bibiabuumbwa biekesia mbo omuloongi aliio. Salikhoo onyala kelukha bung'ali obuno tawe, ne abaabo boosi bali ne kamakesi, ne balolelesia khu kalio, kane bafukiilile likhuwa elino. Lili lia abuwaanga mbo Wele owa ng'ali lundi omenyile niye omuloongi. (Lirakikha 1:1).

2. Kaaba bali Wele niye omubuumbi owe bibiindu bioosi ne mala enya omundu amurekeeresie mala amuloonde, liyingiilila mbo abe ne ekesia omundu lilienya lie nio amanye lili lilala siina. Ne mala aakhola ario. Aakhola ario khubirira mu Bibilia. Khuboolelwa mbo bibiindu bibiaandikwa khu-

loondekhana nende Kristo biaandikwa khukhwola efwe khusuubile. (Yoana 20:30, 31). Khutubakho, kamaandike koosi kama khu Wele khubirira khu muuya kwewe. (2 Timoteo 3:16, 17).

3. Khubela Wele kalomaloma khale, ne niko kalomaloma kaandikwa mala kali mu Bibilia, linyalikhana mbo omundu anyala anyoola kakaandikwa akano, kakasoma ne khukhweyika, mala kakaloonda. Kristo aboolela babee-ka bewe ali bache musibala sioosi mala belwache Elomo Endayi khu buli mundu. (Mariko 16:15, 16). Ne, se kali ako kong'ene tawe, ne kakhali lundi mbo baali ne njala ne bulesia bwe khuuba baluungi bali ne chikhabi siki-la Wele akhabekusie. (Matayo 5:6). Lundi, khuboolelwa khuli abaabo boosi bali ne liliekoomba lie khumumanya ne khumuloonda, Omwami ali baelesia bubweyaangu namwe bunyali bwe khuba babaana ba Wele. (Yoana 1:12).

4. Omundu na soma ne khukhweyika likhuwa lia Wele, lisuubila lisalikhanga mu mwooyo kwewe. (Barumi 10:17). Khukhwama khu limanya nende lisuubila, akeesibwa khu ngila eye khuria ne khuloonda kamalaka ko Omwami, mala kaarera buonia. (Barumwa 2:38, Barumwa 17:30; Baeburania 11:6).

5. Khubirira mu khuria ne khuloonda, omundu aonisibwa ne khutaswa khu sipupu siabo babaonisibwa, bali e kanisa eyo Omwami, khubela aba ka-beele Omukristo. (Barumwa 2:47; Barumwa 11:26).

6. Oli nio aabele mulala khu abaabo bali mu kanisa, ne lundi nga Omukristo, omundu aba erekeekhe khusaaya Omwami nga aboola ali khumusaaye. Nakhakhola ario tawe, omundu sanyala asaaya Wele nga ne enya mu maandike tawe. Khusoma mbo, “Khumanyile khuli Wele se arekeeresianga babooni tawe; arekeeresianga babaandu bamuria ne khukhola niko niye enya.” (Yoana 9:31). Bona oli kamakhuwa kabili kareerebweo niko khukhwola omundu akakhole nio abe ne lilieyikina lie khurekeeresibwa nende Wele. Litaayi, khukhwola abe osaaya Wele, ne lie khabili, khukhwola abe oyo okhola niko Wele enya mala kali mu maandike kewe. Eline liekesia mbo khukhwola omundu abe nende kumuleembe akari wewe nende Wele, namwe akari wewe nende Paapa nende Omwana, namwe abe Omukristo, oli sitonyi sie kanisa eyo Omwami.

7. Nga Omukristo lundi sitonyi sie kanisa eyo Omwami, khukhwola khusaaya khwoo khube khukhwama mu mwoyo nende lundi khuloondekhane ne likhuwa lia Wele nio khufukiililwe. Eline liekesia mbo oyoyo osaaya khukhwola abe nende kamebaasio kali kamalayi. Khusaaya khukhwola khwame mu mwoyo, mu khweboombia, mu buluungi nende mu khumwinaamila. Likhuwa nga elino lieneyebwa kumwoyo kumukwalaafu alala nende khura kame-

baasio koosi khu likhuwa nilio omundu aba nalikho akhola. Oyoyo osaaya sanyala, bukhara kumwoyo kwewe nende kamebaasio khu niko enyebwa ta, akhola busa akaako kakholekhanga mu khusaaya khubela enyebwa mala kafukiililwa tawe. Okwo kuba kumusilisili busa. Khumaliilisia, khusaaya khukhwola khube ne khuloondekhana nende bung'ali. Khwenyebwa khube nga lili-ienya lia Wele ne lili----lili-ienya linyoolekhana mu likhuwa liewe. Lirebo nono lili mbo siina nisio Omwami kakhwekisia? Nga ne khuchiililila, khulabona mbo niko Omwami kekisia kali: Khukhweyika likhuwa liewe lili mu Bibilia, Khusaba, Khukhwimba, Khulia lilikolooya lio Omwami nende Khuaana khu nibio khuli nabio. Khutasakho, akano koosi khukhwola kakholekhe khu ndaalo niyo Omwami aboola ali kekholekhelekho. Omundu akhaba nende kamebaasio ne kumwoyo kumulayi po nalikho nasaaya, kaaba bali khusaaya khwewe se khuli nga kamaandike kaboola tawe, aba khuli busa. Ne lundi, omundu aloonda bulayi po niko kamaandike kaboola mala kumwoyo kwewe kwaloba khuba khu Wele tawe, aba bioosi bili busa. Wele aaboola nga ne enya khumusaaye ne khukhwola khuloonde bulayi nga ne enya.

8. Oyoyo osaaya khukhwola abe abuundu aenyebwa (mu kanisa eyo Omwami) mala abe nakhola akaako niko Omwami aboola, ne lundi abe nende abaabo boshi bali Bakristo, nio khusaaya khwewe khufukiililwe.

Busangaanilo lili likhuwa liboofu po. Omukristo owa ng'ali sanyala asaaya nende kimiaukho kikiakhila ekino, namwe kimikaanda kie dini, tawe khubela khusaaya khwabwe khwabukhana nende okhwo nikhwo khwama khubona. Omukristo owa ng'ali, oli sitonyi sie kanisa eyo Omwami, sanyala asaaya mungila niyo Wele afukiilila khu ndaalo eye Sabato tawe. Sanyala asaaya nende abaabo baloonda chi creedi che babaandu tawe, namwe abaabo babemba eno ne batasa mu khwimba khwabwe bibiindu bibiipa kimienya tawe, namwe abaabo basabila "chikanisa choosi" tawe, namwe abaabo bakhalia lilikolooya lio Mwami buli khu ndaalo eye ebweeni eye lichuuma tawe, namwe lundi abaabo baana "sikelo silala khwikhumi" nende "chimbosio", mala birumikha khukhusia kamakoso ne chingila chimbi tawe. Paulo aaloma ali, "Mukhaba ne buambaani nende bibiindu bikhali ne bukhala nibio babaandu bakholanga tawe, bibiindu bie sisiilima. Ne kakhali birere mu buwaanga." (Baefeso 5:11). Yoana aandika khuloondekhana nende babekisia be bubeeyi ali, "Sikila yesi yesi owenyela omundu lukano oluno kumuleembe, aba yesi afukiilisia naye mu mamayaanu niko omundu oyo akholanga." (2 Yoana 11).

9. **Oyoyo osaaya omwene**----Lili lia abuwaanga mbo oyoyo osaaya sali otaamba buubi tawe, ne elio se limuelesiakho bulekuule bwe khumenya nga ne enya tawe. Kaaba ne alasaaya Wele, khukhwola alekhe mala ekaane

kimiima kimimayaanu nende bikholwa biibi (Yakobo 5:17), mala ekumie buli lwoosi khukhwiseenda khu Wele mu khumusaaya ne kumwoyo kumukwalaa-fu, ne kumubili kukhalikho bunyaalu tawe, alala nende kumwoyo kwe khukhwiboombia.

Ewewe oli osaayanga Wele mu ngila siina? Osaayanga ndaalo siina? Osaayanga khase na khase? Osaayanga khubela siina? Osaayanga naanu? Khuli nende bakali bamusaayanga ne bakekhe bamusaayanga mu bung'ali. Bakali basaayanga oyo okhenyebwa tawe namwe basaayanga mu ngila embi. Yekumia lukali mala obe olachiichanga mu khusaaya khuyililwa oyoyo owenyebwa, ne lundi obe omundu niye Omwami enya amusaaye.

KAMAREBO

1. Mu bioosi nibio Wele abuumba, sili silala siina sinyala siamusaaya?
2. Wele abuumba omundu mu ngila siina?
3. Omundu anyala arobora likhuwa siina?
4. Wele anyoola liiria biise siina?
5. Omundu ali busa siindu siina?
6. Aana bibiindu bilalakho nibio omundu mu ndaalo chibirire ama khusaayanga.
7. Wele enya naanu bamusaaye?
8. Soma Yoana 4:23, 24 mala olomalomekho mu buleeyi khu maandike akano.
9. Naanu owekesianga omundu khu Wele?
10. Boola nga Lirakikha 1:1 ne siboola.
11. Wele ayekesiakho omundu lilienya liewe?
12. Aaba ne eekesia, aakhola ario mungila siina?
13. Soma Yoana 20:30, 31 nende 2 Timoteo 3:16, 17.
14. Siina sikila Wele ne enya omundu amanye lilienya liewe?
15. Linyalikhana mbo omundu amanye lilienya lia Wele?
16. Naanu nibo Wele ali elesia bunyali khuba babaana bewe?
17. Lisuubila lisaalikha liriema mu mwoyo kwo omundu?
18. Omundu aonisibwa khubirira mu siina?
19. Naanu oyoyo owerekeekhe khusaaya Omwami?
20. Wele aulilanga babooni? Khubela siina?
21. Likhuwa siina nilio omundu khukhwola akhole nio abe ne kumuleembe kumulayi ne Wele?
22. Khusaaya mu roho nende mu bung'ali nisio siina?

23. Omundu khukhwola abe waena nio asaaye Omwami?
24. Siina sikila busangaanilo ne buli bwe bukhala bukali?
25. Aanakho bibiindu bilala nibio Omukristo owa ng'ali akhanyala akhola tawe.
26. Oyoyo owenya khusaaya Omwami enyekha amwichakho mungila siina?
27. Khulio nende bakali basaaya Wele mu bung'ali?

LISOMO LIE KHATARU ESIESIO NISIO KHUSAAYA

Khukhwama mu libaang'ana, omundu aiba osaaya, ne, aisaaya bibiindu bioosi asi we nyanga, nende enyanga eng'ene. Khuli nende bi wele bie siseecha nende bie sikhasi chimillioni musibala. Chi ngaangu che khuukia chayombakhwa nende abo basaaya bi wele ebino. Ne, babaandu bakali se balikho nende busangaafu mu dini chabwe echino tawe. Sikila siina? Siina siibi?

Sisiindu sili siibi sili mbo babaandu bakali bakhamusuubilakho Wele owa ng'ali mala omenyile tawe. Kristo akhwekesia Wele oyuno niio aaloma ali, "Wele ali Roho, ne abo bamusaaya khukhwola bamusaaye mu roho ne mu bung'ali." (Yoana 4:24). Nono, Wele niye yeng'ene owenyebwa khumusaaye. Niio omundu alimanyila elino mala anje khuyila khusaaya khwewe khu niye, alinyoola kumuleembe nende khuoleelesebwa kumwoyo---ne ebino bili bibiindu nibio enyanga.

Mu lisomo liliimbi elino, khwenya khumanye Wele niye naanu ne siina sikila khumusaaye.

1. Wele niye omubuumbi owe bibiindu bioosi.

"Mu lirakikha Wele abaang'ana likulu ne liloba" (Lirakikha 1:1). Omundu anyala ayiingana ali yakhaba bali e Bibilia eloma erio, siina sisiekesia mbo elino liabao? Ewe lolakho busa khu bioosi nibio oli akari wabio mala obone nibio Wele abuumba. Liloba lioosi nende bioosi bililimo bili buloli bubwolaana bukhwekesia mbo Wele aliio. Mbakhoo si siindu sinyala siama khu sikhalio tawe. Khukhwola abeo owa sibumba. Daudi aaloma ali, "Likulu liekesia luyali lwa Wele; embaka elangilila kimilimo kiewe." (Chinyimbo 19:1). Naanu onyala kayiingania elino? Naanu oliliyiingania?

Wele abuumba omuseecha nende omukhasi mu fwaani yewe omwene. "Nio Wele aloma ali, "Lekha khukhole omundu mu fwaani yefwe, ne lukoon-do lwefwe, ne lekha bamiie khu ng'eni che mumeechi, khu nyuni che mumbeo, nende khu buli siindu sikeenda ne simoola khu liloba lioosi. Nio Wele abaang'ana omundu mu fwaani yewe. Abuumba omuseecha no mukhasi." (Lirakikha 1:26, 27). "Wele Omunyali Owa Bioosi abuumba omundu owe siseecha khukhwama khu lipukhulu lie liloba, amufua mu moolu kumuuya kwe bulamu mala omundu aba owe bulamu." (Lirakikha 2:7).

2. Wele aana Omwana wewe Yesu khuonia omundu khukhwama mu bwooni bwewe.

Khuloondekhana nende sifuno sie khukhwiicha khwo Omwami khu sibala, khusoma khuli, "Sikila Wele asiima sibala lukali mala aana Omwana

wewe Omuteelwa nio yesi yesi osuubila mu niye akhafwa tawe, ne kakhali abe ne bulamu bwa mindali. Sikila Wele se aaruma Omwana wewe mu sibala khuuba Omukhalaki wasio tawe, ne kakhali abe Omuonia wasio.” (Yoana 3:16,17). Paulo aandika ali, “Ne Wele akhwekesie efwe nga ne akhusiima lukali, lili nga ne khwaba ne khusili babooni Kristo akhufwila.” (Barumi 5:8). Lundi aaloma ali, “Kano kali kamalayi lundi kasiimisia Wele Omuonia wefwe, owenya buli mundu aonisibwe mala amanye bung’ali.” (1 Timoteo 2:3, 4). Khuloondekhana ne buonia bwefwe, aandika ali, “Sikila khulwe kumwalaalo kwa Wele mwaonisibwa khubirira mu lisuubila. Se kali khulwe khukhola kamaani kenye tawe, sili siaanwa sia Wele, nio omundu yesi sakhoya eboneseliakho tawe.” (Baefeso 2:8, 9).

3. Wele aakhubiita chikhabi choosi, che kumubili nende cha roho.

Yakobo aandika ali, “Buli siaanwa silayi lundi sisichufu siamanga mwikulu khu Paapa, oli omubuumbi we buwaanga bwe mwikulu, okhakaluukhananga nga sisiiniini tawe.” (Yakobo 1:17). Paulo aloma ali, “Lekha khuupe orio khu Wele lundi Paapa owo Omwami wefwe Yesu Kristo. Sikila mu buambaani bwefwe ne Kristo akhubiita chikhabi khulwe khu khuelesia buli ekhabi eya Roho mwikulu.” (Baefeso 1:3).

4. Khulio nende Wele mulala yeng’ene owa ng’ali lundi omenyile.

Nalomaloma khu bulala bwa Wele, Paulo aaboola ali, “Aliio Wele mulala, Raraawe owe babaandu boosi, oli Omwami owa boosi, okholanga kimilimo khubirira mu boosi, mala ali mu boosi.” (Baefeso 4:6). Achiililila ali, “Sikila Wele ali mulala, ne oreeranga Wele ne babaandu alala ali omundu mulala, Yesu Kristo.” (1 Timoteo 2:5).

5. Wele ali Roho.

Khusomile khale mu Yoana 4:24 khuli Wele ali Roho. Mungila ekiindi, Wele sali kumubili nende kamafuki tawe. Sali niye onyala wabona namwe wamutilakho tawe. Sali oli abuundu nasilebe tawe. Ne khumanya khuli ali Roho, khunyala nono khwamumanya bulayi khukhilakho khubela khularakikha khumwibaasiakho nga oyo oli angaaki lukali, okhali nga omundu tawe.

6. Wele ali busiime.

Yoana aaboola ali, “Yesi yesi okhasiima tawe, se amanyile Wele tawe, sikila Wele ali busiime. Ne Wele eekesia busiime bwewe khwifwe, khulwe khuruma

Omwana wewe Omuteelwa mu sibala nio efwe khwole khuba ne bulamu khubirira mu niye. Busiime nibwo obuno: se kali bali efwe khwasiima Wele tawe, ne kakhali niye akhusiima efwe mala aaruma Omwana wewe khuba engila niyo efwe khwekanilamo bubwooni bwefwe. Bakoosi, kaaba bali Wele akhusiima efwe ari, nono fweesi khukhoya khusiimane.” (1 Yoana 4:8-11). Aloma ali kaaba bali efwe se khuba ne busiime akari wefwe tawe aba se khunyala khwamanya Wele tawe khubela Wele keyekesia khwifwe khubirira mu busiime.

7. Wele amenyile aluno ari.

Petero afukiilila ali Kristo ali Omwana owa Wele omenyile mindali. (Matayo 16:16). Paulo alomaloma khu kanisa ali eli eya Wele omenyile mindali. (1 Timoteo 3:15). Lundi, alomaloma khwabo babaalekha khusaaya bifwaani ne khukobolela Wele omenyile mindali lundi owa ng’ali. (1 Batesalonike 1:9). Balio balala baloma bali Wele kaafwa. Ne mala babeene nibo babaafwa mu roho. Wele amenyile. Kristo aasomia ali, “Ali Wele we balamu, se ali Wele we bafu tawe.” (Matayo 22:32).

8. Khu Wele bibiindu bioosi binyalikha.

Biise nibio Yesu aalomaloma khu baandu khuloondekhana nende naanu onyala aonisibwa, aaloma ali, “Khu baandu akano se kali kanyalikha tawe, ne kakhali khu Wele bibiindu bioosi bili binyalikha.” (Matayo 19:26).

9. Mbao omulayi tawe ne kakhali Wele yeng’ene.

“Nio Yesu amureeba ali, ‘Siina sikila ne unaanga oli omulayi? Mbao omulayi tawe ne kakhali Wele yeng’ene.’” (Mariko 10:18).

10. Se aliio omundu owabonakho Wele tawe.

Yoana aandika ali, “Se aliio omundu owabonakho Wele tawe, ne akhali Omwana ooli Wele, lundi ooli ne Paapa, omwene oyo niye oomanyisia Wele khwifwe.” (Yoana 1:18).

Khunyala khwachiililila mala khwabona mbo Wele se aromboranga babaandu tawe (Barumwa 10:34,35), mbo amanyile khaale koosi khukhwama khubaang’ana khwe sisialo (Barumwa 15:18), mbo alikhalakila kamebaasio ke mu bwikisi ke babaandu boosi khubirira mu Yesu Kristo (Barumi 2:16), mbo akhuelesia efwe bulamu bwa mindali (1 Yoana 5:11), ne kakaandi.

Wele niye khulomalomakho oyuno amanyile koosi, abona bioosi, aulila koosi, ali buli abuundu khu buli siise, ali owe kamaani koosi ne lundi ali okh-

ali ne lirakikha ne sisiakamo tawe. Se aliio niye khunyala khwa mufwaana-
niakho tawe. Niye ali omubuumbi owa bioosi. Ali yeng'ene niye khukhoya
khusaaya, khufumia, khuelesia liiria nende luyali biise ebino nende mindali.

Wele enya lisaaya liefwe ne kakhali se ali khuyiingililakho khumusaaya
tawe. Abo barobora khumusaaya balinyoola chikhabi khuloondekhana nende
bikholwa biabwe.

Ne, Wele se alifukiililakho lisaaya liosi liosi busa tawe. Kaaba ne khucha
khumusaaya, khukhwola khumusaaye nga niye omwene ne aboola. Se kali
nga efwe ne khwenya tawe. Kakhwekesia lisaaya nilio enya mu likhuwa liewe,
ne mu masomo kaloondakho, khucha khubona lisaaya nga ne lili.

KAMAREBO

1. Biindu siina nibio omundu aamanyikha mbo asaayanga?
2. Mu buleeyi boolakho siina sili siibi nende khusaaya khwe babaandu bakali.
3. Boola nga Yoana 4:24 ne siboola.
4. Naanu niye owenyebwa omundu amusaaye?
5. Boola nga Lirakikha 1:1 ne siboola.
6. Boola malala khwako kakekesia mbo Wele aliio.
7. Siindu siina sisiekesia luyali lwa Wele?
8. Wele abumba omundu owe sisecha nende owe sikhasi ariena?
9. Siina sisiakila Wele aana Omwana wewe eeche khu sibala?
10. Boola nga Yoana 3:16, 17 ne siboola.
11. Naanu owa khufwila efwe?
12. Efwe khuonisibwa mungila siina?
13. Chikhabi nicho khunyoola choosi chama waena?
14. Somakho Baefeso 1:3.
15. Paulo aloma ali siina khuloondekhana nende bulala bwa Wele?
16. Onyala walomaloma khu Wele mu bubalaayi oriena?
17. Mu bubalaayi, elomo "Wele ali busiime" eboola siina?
18. Wele amenyile biise ebino? Mungila siina?
19. Bibiindu bioosi binyalikhana khu Wele?
20. Naanu niye omulayi?
21. Omundu yesi yesi aabonakho Wele?
22. Wele ali oorombosia babaandu?
23. Mu khumaliilikha, naanu olikhalakila sibala?
24. Boolakho kamakhuwa malala kakekesia liiba lia Wele.
25. Wele enya khumusaaya khwa lukano siina?

LISOMO LIA KHANE CHINGANO CHE KHUSAAYA

Ne khusoma mu Ndakaano Embia, khunyoolamo chingano chitaru che khusaaya. Mu lisomo elino, lekha khuloleelelekho khu buli lukano. Elino khukhola ne khumanya khuli khulio nende khutumakho lukano lulala lwe khusaaya mu maandike. Kane lundi khuloleelelekho khu ngano che khusaaya chino choosi nio khumanye luli lukano siina nilwo Omwami enya. Khumaliilisia, khulenyekha khubona khuli, khubeela busa mbo babaandu balikho basaaya, se liekesia mbo khusaaya khwabwe khufukiililwa nende Wele, ne lundi mbo balikho bakhola kakenyebwa, tawe.

1. Kamaandike kalomaloma khuloondekhana nende khusaaya nisio omundu akhamanyile tawe.

“Nga Paulo aba nasilindiilila Sila ne Timoteo mu Ateni abiililwa lukali nga abona bifwaani bikali mu lukoba olwo. Nio mu sinakooki ayingana ne Bayaudi ne babaandu Be Chikholo ba basaayanga Wele, ne buli ndaalo khu soko aayingananga ne babaandu babechanga embi naye. Balala khu bekisia be Epikuro ne Basitoiki bayingana naye. Babaandi khu nibo bareeba bali, Omusilu owibonia oyuno alakhakanga khukhuboolela efwe siina? Balala bakobosia bali, “Kalolekhana olalomalomanga ke ba wele bakeni.” Baloma bario sikila Paulo aba alikho elwacha ka Yesu ne ke lila mukha. Khwako babukula Paulo, bamuila ebweeni we kumuse kwe lukoba bali Areopako, baloma bali, “Khwenya khumanye liliekisia liya nilio olikho olomakho lino. Bibiindu bilala nibio khuulile ne kamaru kefwe, bilolekha khuba bikeni busa khwifwe, nono khwenya khumanye bifuno biabio bili siina.” (Sikila babaandu boosi mu Ateni ne bakeni boosi bamenyilemo barumikhiranga biise biabwe khulomaloma ne khuulila kamakeni). Paulo eema ebweeni we kumuse kwe lukoba mala aloma ali, “Naboone ndi enywe babaandu mu menyile mu Ateni muli babaandu be dini mu ngila choosi. Sikila nga nakeendile mu lukoba lwenywe oluno ne khubona abuundu niio musaayilanga, nanyoolile alutare niyo baandikakho bali, ‘KHU WELE OKHAMANYIKHAANE OYO’. Khwako Wele niye musaayanga ne mukhamumanyile oyo, omwene oyo, ali niye ese luno ndikho mwilwachila. Wele, owabuumba sibala ne bilimo bioosi, ali Omwami owe likulu ne liloba, ne se amenyaanga mu ngaangu chichombakhwa ne babaandu tawe. Namwe se enya sisiindu sisi sisi nisio khunyala khwaana khulwe khumurumikhira tawe, sikila ali omwene oanaanga bulamu, kumuuya nende buli siindu khu buli mundu. Khukhwama khu mundu mulala, abuumba Chikholo che babaandu choosi achikhola khumenya buli

abuundu mu sibala sioosi. Omwene anyoa akhalaka khale siise ne chinjakha cha buli abuundu niio bakhoyela khumenya. Akhola ario, nio bamuyiime, wakana bamunyoola. Ne kakhaba kario, Wele se ali aleyi khu buli mulala khwifwe tawe. Nga omundu mulala aloma ali, “Mu niye efwe khumenya, lundi khukeenda, lundi khubaa! Kali nga balala mu mienya kienywe baaloma bali, ‘Akhaba fwesi khuli babaana bewe’. Ne nga khuli babaana ba Wele, se khukhoyeele khwebaasia khuli, liba liewe lili busa nga eshabu namwe efwesa namwe libaale liliabeechwa ne busicha bwo omundu tawe. Mu siise nisio babaandu babeela basilu, Wele ekhola nga okhabona tawe. Ne oluno, alaka babaandu boosi buli abuundu bekanile mala bakalukhane. Sikila amala khurao endaalo niyo alikhalakilamo sibala sioosi, mu buluungi mu ngila eyo omundu mulala niye arobora, Wele ekesia babaandu nga alamusia omundu chana oyo khukhwama mu lifwa.” (Barumwa 17:16-31).

Khubirira khu akano, olabona oli Paulo kaakanana nende khusaaya bifwaani mu lukoba lwa Ateni. Mala abekesia nga ne khukhalikho ne bukhalatawe ne lundi nga ne basaaya bukhamanya nisio basaaya tawe. Namalile ario, aabelwachila Wele owa ng’ali ne lundi omenyile.

Siina sisiakila ne basaayanga bifwaani? Siina sikila omundu enaamile bifwaani? Sifwaani sili sisiindu sing’oonwa khukhwama khu libaale, kumusaala namwe siibia, ne se sili nende bulamu namwe roho tawe. Se sili ne bunyali bwe khubona, khuulila, khuunyilisia, khulomaloma, khukeenda, khukhwibaasia namwe khubiita chikhabi tawe. Aakhaba sisiindu sisiang’oonwa nga esiesio ne sirumikha khukhwimeelela sisiindu sisiindi namwe omundu okundi, ekhumaliilikha sikholwanga khuba sifwaani sie khusaaywa nga wele.

Bali busa abo bakhamumanyile Wele owe mwikulu tawe banyala benaamila sifwaani namwe sisiindu sisiindi si sia buumbwa, sibeete sie khusibala namwe abeete omundu: omulamu namwe owafwa.

Aluno ari, nga busa anyuma aao, babaandu basinaamila bifwaani musibala. Ne, siina sikila? Butinyu bukila ne liba lirio buli busa bwachana obwo---khuloba khumanya, khwong’ene. Salio yesi yesi oli ne limanya nende bukesi bubalaayile onyala kasaaya sifwaani tawe, akhaba enje we Bukristo namwe mu bubacha bulaangwa khuba Bukristo.

2. Kamaandike kalomaloma khuloondekhana ne khusaaya khuli khwa busa.

Kristo aaloma ali, “Bakhola ka busa khu khusaaya ese, bekisia kamalaka ke babaandu busa bali kakaase khana tawe.” (Matayo 15:9). Lundi aaloma ali, “Se kali bali buli omundu oundanga ese ali, ‘Omwami, Omwami’, alingila mu

bwami bwe mwikulu tawe, ne kakhali abo bakholanga lilienya lia Paapa wase oli mwikulu bong'ene. Endaalo ng'eneyo bakali balinjiloochela bali, 'Omwami, Omwami, se khwang'ooolela mwisina liowo? ne mu lisina liowo khwarusia bisieno khukhwama mu baandu? ne khukhola kamayia kamakali mwisina liowo? Mala ndibaboolela ndi 'Ese se namumanyakho enywe tawe, khemundureo, enywe mukholanga kamamayaanu.'" (Matayo 7:21-23).

Khukhwola biise ebino, khuli nende basisomia bali babaandu bo Omwami banyala basaaya mu ngila chichabukhaane, liboofu busa mbo babe baluungi ne lundi bakhali ne bubacha mu miooyo kiabwe tawe. Mbo balamala busa bakhola bario, lisaaya liabwe lilafukiililwa ne Wele. Obuno bubeeyi nibwo. Khusaaya nikhwo omundu akhola khuli khwa busa kaaba bali khuli okhwo khuloonda kamekasio nende kamalaka ke babaandu. Khuuba busa khwekesia mbo se khulimo siosi siosi tawe, bukhalamo twa, ne se khuaana siosi siosi tawe. Khusaaya nga khukhwenokhwo se khufukiililwa ebweeni wa Wele tawe.

Khubela busa bali sipupu sie babaandu bakaanana "mu lisina lia Kristo" se khwekesia mbo khusaaya khwabwe khufukiililwa tawe. Khurakikha, kaaba bali bakaanana nga basaangi be kumwaukho nasilebe, aba se balikho bakaanana mu lisina lia Kristo tawe, ne kakhali mu lisina lie kumwaukho kwabwe. Lundi, buli kumwaukho kulasaaya khuloondekhana nende engila yakwo. Omwami aloma ali babaandu bakali balikho bacha khukhwima ebweeni wewe mala bacha khuloma bali bamukhebusia koosi niko bakhola, ne khubela se baloonda lilienya liewe tawe, ne lundi se bali be luuya lwewe tawe, alikho acha khubaloba ne khubatimania.

Kaaba bali khusaaya khwoo khuloonda kamekasio ke babaandu, ne niko okholanga mu khusaaya khwenokhwo se kanyoolekhana mu likhuwa lia Wele tawe, aba khusaaya khwoo khuli busa ne se khufukiililwa ne Wele tawe. Ebino nibio biise bie khukhwelolelesia bulayi.

3. Kamaandike kalomaloma khuloondekhana ne khusaaya khwa ng'ali.

Kristo aaloma khuloondekhana ne khusaaya ali, "Wele ali Roho, ne abo bamusaaya khukhwola bamusaaye mu roho ne mu bung'ali." (Yoana 4:24).

Lekha khuloleelelekho kamakhuwa makekhe ano. Litaayi, Wele ali yeng'ene niye khuyilakho kamasayo kefw, nga ne khuboone mu lisomo libirire. Lie khabili, abo bamusaaya khukhwola bakhole bario nga Omwene na boola ali bakhole. Salio yesi yesi ocha khuyiingililwa khusaaya Wele tawe, ne kakhali abo barobora khumusaaya khukhwola bamusaaye nga Omwene ne aloma ali bakhole. Se benyebwa khumusaaya nga babeene ne benya namwe

nga babaandu ne ba boola tawe. Lie khataru, khusaaya khukhwola khube khwe mu roho ne mu bung'ali. Eline nilio likhuwa siina? Lili mbo khusaaya khwe mu roho khuli khwe kumwoyo kumuluungi, mu limanya nende mu khweboombia. Ne, khusaaya mu bung'ali khuli mbo omundu asaaya khuloondekhana ne kamaandike nga ne kaboola. Nga bung'ali ne bukhwekesia, lili busa mbo khusaaya khwefwe khukhwola khube busa nga ne khwaandikwa mu maandike. Ne, akano aba se kali kamaangu? Khu baandu balala, kali kamaangu khutuma sikelo siabwe. Benya bakhole bisaango, bibiindu bie khukhwililamo, kimiyumo, ne bibiindi. Ako se kali niko Wele enya tawe. Wele enya babaandu bewe bamusaaye khukhwama mu miooyo kiabwe nga ne aaboola mu maandike. Se enyakho likhilakho aao namwe liboombelelwakho tawe.

Okhuno nikhwo khusaaya khunyoolekhana mu Ndakaano Embia, ne nga ne khuchiililila khukhweyika, khulabona khuli Bakristo bataayi basaaya bario, ne fwesi khukhwola khusaaye khurio. Efwe fweesi ne khusaaya khurio, khulasaaya mungila efwaanana, ne Omwami alafukiilila khusaaya khwefwe.

KAMAREBO

1. Khuli nende chingano chinga che khusaaya nicho khusoma mu Ndakaano Embia?
2. Aana bifuno bilalakho bie lisomo elino.
3. Paulo anyoola lukoba lwa Ateni ne luli lwa lukano siina?
4. Boolakho mu buleeyi khusaaya khwe babaandu ba Ateni nga ne khwaba.
5. Paulo aaloma ali siina khuloondekhana ne khusaaya khwabwe?
6. Aana kamakhuwa kamaboofu mu melwacho ka Paulo.
7. Paulo abekesia khu naanu?
8. Siina sisiakila ne basaayanga bifwaani?
9. Sifwaani sing'oonwanga khu siindu siina?
10. Yekesiakho bibiindu bilala nibio sifwaani sikhanyala khukhola tawe?
11. Omundu anyala enaamila sifwaani kaaba bali amanyile Wele owa ng'ali lundi omenyile?
12. Khulikhoo biise ebino nende abo ba benaamila bifwaani?
13. Boola nga Matayo 15:9 ne siboola.
14. Soma Matayo 7:21-23.
15. Khusaaya khwa busa nisio siina?
16. Khusaaya khufukiililwa nende Wele bali khubeela busa khuli “mu lisi-

na lia Kristo”?

17. Wele enya khusaaya khwa lukano siina?
18. Naanu niye efwe khwenyebwa khuyilakho kamasaya kefwe?
19. Omwami anyala ayiingilila omundu khumusaaya?
20. Naanu owenyebwa khuboola nga khusaaya ne khwenyebwa khube?
21. Boolakho khusaaya Wele mu roho nende mu bung’ali nisio siina.

LISOMO LIA KHARANO

KHUSAAYA KHWE BAKRISTO BATAAYI

Lili likhuwa lisiimisia ne khumanya babaandu basaayanga bariena, basaayilanga waena, basaayanga biise siina, bakholanga makhuwa siina ne basaaya, ne kakaandi. Khumanyile khuli aluno ari khuli nende chikanisa chingali po, ne chingali chili nende chingila chichabukhana che khusaaya. Sikila siina chabukhane? Lienyebwa khube ne khukhwabukhana khuno? Khunyala khwamanya khuriena khuli kho khusaaya Omwami nga ne enya? Engila endayi po eye khumanya eli khuucha khuenje mu maandike, mala khubone nga Bakristo bataayi ne basaayanga.

E kanisa ne yamala khukhwanjisibwa endaalo eya Pendekositi, buloli buboola buli, “Barumikhira biise biabwe khukhweyika khukhwama khu barumwa, khumenya alala mu busangaanilo, ne bakabana biakhulia ne khusaba Wele.” (Barumwa 2:42). Basuubili abano, namwe Bakristo, barumikhira biise biabwe khukhweyika kamekisiyo ke barumwa. Bakholanga siina mu khukhola khurio? Akhaba bali bitonyi bioosi bie khusaaya Wele se biekesibwa ano tawe, bitaru khwibio biekesibwe. Ebino bili busangaanilo namwe khuaana, khukabana siakhulia namwe lilikolooya lio Mwami nende khusaba Wele.

Biise ne bibirirekho, khubona Paulo naali khu lukeendo mala nabira mu lukoba lwa Turoa. Kekhala e Turoa khu biise khukhwola nga endaalo eye khukhwebuusia alala khusaaya Wele ne yoola mala kasaaya nende Bakristo ebweneyo. Khusoma mu buloli khuli, “Khu ndaalo eye ebweeni eye lichuuma, khwebuusia alala khunyoola siakhulia sie busangaanilo. Paulo aba enyile khurekukha endaalo eloondakho, khwako achiililila khukhwilwachila babaandu khukhwola mu silo akari.” (Barumwa 20:7). Ano khubona khuli endaalo eye khusaaya yaba eye ebweeni eye lichuuma. Libonekhana abuwaanga Paulo ola Turoa mu Barasa. Nio anyoole bubweyaangu bwe khusaaya ne nabo, Paulo amenya nabo lichuuma limuufu, kaabira mu Nyongesa, nio khu ndaalo eye ebweeni eye lichuuma anyale khusaanga nende babaandu ba Wele mu khusaaya. Eyino niio endaalo yaroborwa nende Omwami. Lundi, buloli buboola buli eyino niio yaba endaalo eye basuubili, namwe Bakristo, khukhwebuusia alala khukabana siakhulia namwe khulia lilikolooya lio Mwami. Khumaliilisia, Paulo arumikhira biise ebino khukhwilwacha, oli amala naacha khu lukeendo lwewe.

Mu 1 Bakorinjo 10 nende 11, Paulo aandikila basiime be bu Korinjo khulondekhana ne buboofu bwe lilikolooya lio Mwami. Ali, “Sikila nanyoola khukhwama khu Mwami liliekisia nilio namubooleele enywe, ndi siilo ni-

sio Omwami Yesu aachaamwa, aabukula kumukaati, aakhupila Wele orio, aakumesulamo, aaloma ali, “Bukula, khe mulie. Kuno kuli kumubili kwase kuuli khukhupisibwa siibi khubela enywe. Khola akano mukhukhebulila ese.” Mu ngila ng’eneyo, enyuma we siakhulia abukula sikoombe aaloma ali, “Sikoombe sino sili sie endakaano embia eyichusiibwe khubirira mu mafuki kase. Mu siise siosi siosi ne munywaamo, khola muri khu khuukhebulila ese”. Sikila akano kekesia mbo buli nga ne mulia kumukaati okuno lundi ne munywa mu sikoombe esino, mwilwachanga lifwa lio Mwami khukhwola nga akheeche. Khwako, omundu yesi yesi nalia kumukaati kwo Mwami, namwe nanywa khukhwama mu sikoombe siewe mu ngila eye khulekha khumuria tawe, aba aakholele bubwooni kumubili ne kamafuki ko Mwami. Nono, buli mundu akhoyeele anyoe emenieelesie omwene, nio alie kumukaati ne khunywa mu sikoombe sio Mwami. Sikila aaba bali omundu sanyala amanya nilio kumubili kwo Mwami kwekisia tawe, nga alia kumukaati ne khunywa mu sikoombe, aba ereerera omwene bukhalaki nga nalia ne khunywa. Ako kakila bakali mwinywe ne bali batekhele lundi balwale, lundi bakali bafwa.” (1 Bakorinjo 11:23-30). Nono, lekha khubone akaako kali kamaboofu mu lisomo elino:

1. Paulo aanyoola khukhwama khu Mwami.
2. Aloma ali kumukaati kwimeelela kumubili kwa Kristro ne sikoombe nasio simeelela kamafuki kewe.
3. Lilikolooya lio Mwami liliibwa mu khukhebulila kumubili nende kamafuki ka Kristo.
4. Khukhola khurio khuli khukhwilwacha lifwa lio Mwami khukhwola nga akheeche.
5. Abaabo balia ne khunywa bu khamuria tawe, lundi ne bakhali basuubilwa khu niye tawe, baba bereerera babeene bukhalaki.
6. Nio yesi yesi alie khukhwola emenieelesie abone mu mwoyo mwewe muli muriena. Likhuwa liaaba mbo, kaaba bali omundu ali ne bubwooni mu bulamu bwewe bumwikayila khulia lilikolooya lio Mwami, khukhwola areo kumuleembe nende Wele mala nio alie. Lili lia abuwaanga mbo omundu se enyekha khulia lilikolooya lio Mwami kaaba bali limenya liewe se lili lifwaa Omukristo tawe. Ne, lundi mbo, kaaba bali omundu amenyile limenya lifwaa Omukristo, sakhoyele alekha khulia lilikolooya lio Mwami tawe. Nono, siosi siosi sili mu limenya lio omundu mala sikhenyebwa khubamo tawe khukhwola sirusibwemo mala anyale khulia lilikolooya lio Mwami nga Omukristo omusuubilwa.
7. Babaandu bo Omwami se bakhoyela bekayile babasiabwe khulia lili-

kolooya lio Mwami tawe. Paulo aaloma ali buli mundu emenieelesie omwene nio alie. Wele anyala alola mu mwoyo kwo omundu, ne efwe Bakristo se khunyala tawe. Nono, se khuli nende bulekhule bwe khukhalakila omundu mbo alie namwe akhalia ta tawe. Lili mbo buli omundu omwene ayetiukha kumulimo kwe khukhwelolelesia ne khukhwemenielesia, mala omwene lundi kefwananie khu niko e Bibilia esomia.

Lundi mu 1 Bakorinjo 11, Paulo arafuirira Bakorinjo khubela baabukula lilikolooya lio Mwami mala balikhola khuba naikara eye khulia ne khunywa. Mukhukhola bario, bakichekheelela. Ababoolela ali bali ne chinju chaabwe nimwo banyala bakholela naikara chabwe echo, oli bamalile, ne nono becha mu busangaanilo, nio khukhaba khulia ne khunywa bekure tawe. Lisili busa liri aluno ari. Bakristo khukhwola bebuusie bukhaba ne kumusilisili kwosi kwosi tawe mala basaaye. Benyebwa balie kumukaati ne khunywa sikoombe khukhebulila kumubili ne kamafuki ka Kristo biong'ene. Sisiindu sisiindi twa.

Ne khucha mu 1 Bakorinjo 16:1, 2, khunyoola Paulo lundi nalomaloma khu lubeka lwe khuaana. Aandika ali, “Nono, khuloondekhana ne chirupia chikhoyeele khurusibwa khuyeeta babaandu ba Wele mu Buyuda, khukhwola mukhole nisio naboolela chikanisa mu Kalatia khukhola. Buli khu ndaalo eyo Mwami buli sia mulala khwinywe khukhwola are alubeka chirupia, khuloondekhana nende nisio anyoolile mu muruungo mala muchibiikhe nio mukhenaana khubusia chirupia ne nichile tawe.” Lundi aandika ali, “Khebulila muli omundu omiicha bumiicho bukeekhe akesa bukeekhe, ne oyo omiicha bukali akesa bukali. Buli mulala enyekha aane nono nga ne abisiisie, akhakelao esonia tawe, namwe akhaana sikila enyebwa khukhola ario tawe, sikila Wele asiima omundu oanilanga mu busangaafu.” (2 Bakorinjo 9:6, 7). Eline liekesia mbo babaandu bo Mwami khukhwola babe baani. Khusomamo kamakhuwa akano:

1. Benyebwa baane khu ndaalo eye ebweeni eye lichuuma.
2. Bakristo boosi benyebwa khuaana.
3. Benyebwa khuaana khuloondekhana nende nisio baba nasio.
4. Khuaana khwabwe khwaloondekhana nende khunyoola khwabwe mu muruungo. Salikhoo osi osi mu Ndakaano Embia niio khuboolelwa khuaana sitonyi silala khu likhumi namwe niio sikelo sie khuaana siaabisibwa tawe.
5. Benyebwa khuaana nga ne baba ne babisiisie mu miooyo kiabwe khale.
6. Se benyebwa khuaana mu khwesonia namwe khubela benyebwa khukhola bario tawe.
7. Ne kakhali benyebwa khuaanila mu busangaafu khubela Wele aasiima omundu oanilanga mu busangaafu namwe oyo owenyanga khuaana ne mala

lundi asangaalilanga khuaana okhwo.

Endakaano Embia elomaloma khu khwimba. Likhabi lilala lili niio Paulo nende Sila bamba kimienya kifumia Wele ne bali mu siboe (Barumwa 16:25). Ne, se khulikho nende niio sipupu sie babaandu ba Wele bebuusia alala endaalolo eye ebweeni eye lichuuma khukhwimba tawe. Ne, kakhaba kario, baandiki babaandika akako kakaama khu Wele, lundi ke kumuuya kwewe, baboolela Bakristo bembe (Baefeso 5:19; Bakolosayi 3:16). Khukhwimba nono khwaba sitonyi sisiindi sie khusaaya nisio Bakristo bataayi bakholanga.

Ne khura koosi alala, khunyoola mbo babaandu bo Mwami bebuusianga endaalolo eye ebweeni eye lichuuma khu saba Wele, khukhweyika khukhwama mu likhuwa liewe, khukhwimba, khulia lilikolooya lio Mwami nende khuaana. Se khusomakho mu Ndakaano Embia sisiindu sisiindi nisio bakhola tawe. Yakhaba abaabo babaandika buloli bwako kakaaba ne kekholekha musibala mu ndaalo echo (mala bakhaaba ne baandika ne kumuuya kwa Wele tawe) baboola busa kamene nga niko Endakaano Embia eboola. Nono, akano kakhwekesia bulayi akaako niko Bakristo bakholanga mu ndaalo echo ne basaaya Wele. Fwesi se khwenyekha khukhola khurio ku?

KAMAREBO

1. Chikanisa chingali chisaayanga mu khufwaanana ku?
2. Khunyala khwamanya khuriena kaaba bali khulikho khusaaya Wele nga ne enya khumusaaye?
3. Siina sisiekholekha e kanisa ne yaamala khukhwanjisibwa e ndaalo eya Pendekositi?
4. Boola nga Barumwa 2:42 ne siboola.
5. Basuubili bachiililila mu siindu siina?
6. Bitonyi bie khusaaya bioosi biboolwa ano?
7. Siina sisiakila Paulo eema e Turoa khu ndaalo ngekhe?
8. Barumwa 20:7 siboola sili siina?
9. Bakristo bebusiaanga ndaalo siina eye lichuuma?
10. Boolakho bibiindu bilalakho nibio bakholanga ne bebusiisie alala.
11. Bakorinjo baaba baandu siina?
12. Paulo aanyoola siindu siina khukhwama khu Mwami?
13. Siina sisiakilanga balie kumukaati ne khunywa mu sikoombe?
14. Khukhola bario khwekesianga siina?
15. Omundu anyala alia ariena lilikolooya lio Mwami mu khulekha khumuria?

16. Boolakho mu bubalaayi elomo eyino, “Buli mundu akhoyeele anyoe emenieelesie omwene, nio alie.”

17. Omundu anyala alia ne khunywa mu khwereerera omwene bukhalaki?

18. Kanyalikhana omundu abe Omukristo omusuubilwa mala alekhe khulia lilikolooya lio Mwami?

19. Babaandu bo Mwami khukhwola balie lilikolooya lio Mwami babeene ne bakhhalaka naanu owenyebwa khulia ne naanu okhenyekha tawe? Kaaba bali tawe, siina sikila?

20. Siina siakila Paulo aabiiya Bakorinjo khuloondekhana nga ne baba ne balia lilikolooya lio Mwami?

21. Soma 1 Bakorinjo 16:1, 2.

22. Ndaalo siina niyo Bakristo benyebwa khura alubeka chirupia?

23. Beenga khu Bakristo benyebwa khuaana?

24. Benyebwa barusie siina?

25. Benyebwa barusie sikelo siina?

26. Boola nga 2 Bakorinjo 9:6, 7 ne siboola.

27. Wele aasiima omuaani owa lukano siina?

28. Aana bitonyi birano bie khusaaya Wele.

LISOMO LIA SITA E NDAALO EYE KHUSAAYA

Mu Ndakaano Embia, khuboolwa bukhala buboofu bwe khusaaya nende lundi khuboolwa Omwami enya khwebuusie alala ndaalo siina mala khumusaaye. Eli ndaalo siina?

Balio basomia bali e ndaalo eye Sabato esili niyo khwenyebwa khulonda nga niyo khwenyebwa khusaayilekho. Eline lili lia ng'ali ku? Kaaba bali lilaka lia Musa liarusibwao nga ne khubona mu 2 Bakorinjo 3, Bakolosayi 2:14, Baeburania 9:16,17 nende Baeburania 10:9, aba se lili lia ng'ali tawe. Bayiingana bali Paulo kakaananga nende Bayaudi khu ndaalo eye Sabato. Bung'ali bulimo, ne kakhali mbao niyo khuboolwa mbo bakaananga khusaaya tawe. Ne kakhali, kakaananga ne nabo nio anyoole bubweyaangu bwe khubasomia lili enya lia Wele.

Ne, kaaba bali e ndaalo eye Sabato se eli niyo khusaayilakho tawe, aba ndaalo siina? Ne khuyiima mu Ndakaano Embia, khunyoola kamaandike kakhukalusia khu lirebo elino. Khunyoa, khubukule sipupu sie Bakristo be Ndakaano Embia babaaba ne bebuusie alala khubone baba bebuusie ndaalo siina nio khulolelekho. Lola, buloli buboola buli Paulo ne aaba khulu-keendo khubirira mu lukoba lwa Turoa, eema khu ndaalo ngeekhe nio anyoole bubweyaangu bwe khu khwakaanana nende Bakristo be bweneyo mala basaayile alala. Lekha khusome, "Khu ndaalo eye ebweeni eye lichuuma, khwebuusia alala khunyoola siakhulia sie busangaanilo. Paulo aaba enyile khu rekukha e ndaalo eloondakho, khwako achiililila khukhwilwachila babaandu khukhwola mu silo akari." (Barumwa 20:7). Nosiima soma Barumwa 20:6 obone mbo kaamenya e Turoa chindaalo saba. Eline liekesia mbo kaaba e Turoa khu ndaalo eye Sabato, ne buloli se buboola buli kakaanana ne Bakristo khu ndaalo ng'eneyo tawe, ne kakhali khu ndaalo eye ebweeni eye lichuuma, namwe khu ndaalo eyaloonda khu Sabato. Liboofu siina linyolekha ano? Lili mbo Paulo se aalinda aakaanane ne Bakristo khu ndaalo eye Sabato nio basaaye tawe, ne kakhali aalinda nio abeo khu ndaalo niyo Omwami arobora khumusaayilakho, ne eyino eli e ndaalo eye ebweeni eye lichuuma.

Ne e ndaalo eye ebweeni eye lichuuma niyo ndala siina ku? Aasi we lilaka, e ndaalo eye Sabato yaaba e ndaalo eya saba eye lichuuma. Liekesia mbo, kaaba bali e Sabato eli e ndaalo eya saba eye lichuuma, ne lichuuma lili ne chindaalo saba, aba nono nga e Sabato ne ewa busa, e ndaalo eye ebweeni eye lichuuma lie khabili erakikha. Mu ndaalo cha lelo, elaangwa Mwichuuma (Sunday), ne niyo eye ebweeni eye lichuuma.

Sikila siina e ndaalo eye ebweeni eye lichuuma? Aasi we Lilaka lia Musa, e ndaalo eye khusaaya Wele yaaba eye Sabato, namwe endaalo emaliilisi eye lichuuma. Aasi we lilaka lia Kristo, e ndaalo eye khusaaya Wele eli eye ebweeni khwichuuma, eye Mwichuuma (Sunday). Liekesia mbo Omwami se eecha mu khumalilikha tawe ne kakhali mu khunyoa. (Matayo 6:33).

Ne khuchiililila, lekha khubone omurumwa Paulo na boolela basiime bewe ebukorinjo khuloondekhana nende e ndaalo eye khuaana khu nibio bali nabio. Khusoma khuli, “Nono, khuloondekhana ne chirupia chikhoyeele khurusibwa khuyeeta babaandu ba Wele mu Buyuda, khukhwola mukhole nisio naboolela chikanisa mu Kalatia khukhola. Buli khu ndaalo eyo Mwami buli sia mulla khwinywe are alubeka chirupia, khuloondekhana nende nisio anyoolile mu muruungo, mala muchibiikhe nio mukhenaana khubusia chirupia ne nichile tawe.” (1 Bakorinjo 16:1,2). Siina sisiakila e ndaalo eyino yaroborwa nga eye khuaanilakho? Khubela eyino niio eyaba e ndaalo eye khusaaya Wele, ne lundi khubela aba bebuusisie alala, khuaana khuba khukhwangu. Ng’ali, abanga e ndaalo eye khusaaya yaaba khu Sabato, Paulo se kakhaboleele Bakristo lundi bebuusisie alala e ndaalo eloondakho nio baane tawe. Ne, abo basomia bali e ndaalo eye khusaaya Wele eli khu Sabato, bakobolaanga e ndaalo eloondakho nio baria liliyenya lia Wele mbo baane ku? Kaaba bali tawe, siina sikila?

Khu biise bibiindi, Yoana aalomaloma khu ndaalo eye ebweeni eye lichuuma nga endaalo eyo Omwami. Ali, “Khu ndaalo eyo Omwami naba mu Roho.” (Lifunulwa khu Yoana 1:10). Buli bung’ali mu ngila ndala mbo buli ndaalo eli eyo Omwami ne kakhali libonekhana busa abuwaanga mbo Yoana aaba alikho aalomaloma khu ndaalo eyabukhaane eyino. E ndaalo eyo Omwami ano niio e ndaalo eye khukhwebuusia mala khusaaye Wele, namwe e ndaalo eye ebweeni eye lichuuma. Ne busa, siina sikila akilaange khuba e ndaalo eyo Omwami?

Siina sikila e ndaalo eye ebweeni eye lichuuma ne eli emboofu eri? Khwakhabona khuli khubela lilaka liakalukhanisibwa ne nono Omwami biise ebino niye orangira. Kakhaba kario, khuli lundi nende bifuno bibiindi.

1. Kristo aalamusibwa khu ndaalo eye ebweeni eye lichuuma.

Ne bwasia e ndaalo niyo Omwami aalamusibwakho mu mabwibwi, buloli buboola buli, “Oli endaalo eye Sabato yabira, busia bwe ndaalo eye ebweeni eye lichuuma, Maria Makatalena ne Maria okundi oyo bacha khulola siliindwa.” (Matayo 28:1). Biise bikekhe khu ndaalo ng’eneyo busa, khusoma khuli, “Yaaba Mwichuuma ekolooba, neli e ndaalo eye ebweeni eye lichuuma, barumwa baaba bebusiisie alala munju mala bakhomekhe kumuliango sikila baba barire Bayaudi be bunyali, nio Yesu eecha mala eema akari wabwe, alo-

ma ali, “Kumuleembe kube nanywe.” (Yoana 20:19).

2. Yesu aabonekhela barumwa bewe lundi khu ndaalo eye ebweeni eye lichuuma.

Yesu aarura mu silindwa khu ndaalo eye ebweeni eye lichuuma mala aabonekhela barumwa bewe endaalo busa eng’ene. Lundi khubona mbo aabonekhela babeeka bewe chana lwe khabili khu ndaalo eye ebweeni eye lichuuma. Buloli buboola buli, “Enyuma we lichuuma, babeeka baba lundi alala munju mala bakhomekhe kimiliango. Tomasi aba ne nabo. Yesu eecha mala eema akari wabwe aloma ali, “Kumuleembe kube nanywe.” (Yoana 20:26). Kaaba bali Yesu aabonekhela barumwa bewe khu ndaalo eye ebweeni eye lichuuma ne mala oli chabirire chindaalo munane lundi aababonekhela, aba yaaba ndaalo siina niyo kababonekhela lwe khabili? Aba khu ndaalo eye ebweeni eye lichuuma. Siina sikila kamaandike ne kekhalila khukhwekesia e ndaalo eyino khase na khase? Khubela eyino echa khuba e ndaalo emboofu po aasi we lilaka lia Kristo. Niio echa khuba e ndaalo eye khusaaya.

3. E kanisa yaanjisibwa khu ndaalo eye ebweeni eye lichuuma. (Barumwa 2).

E ndaalo eya Pendekositi yecha chindaalo kamakhumi karano khuloonda khu ndaalo eya Pasaka, ne khu ndaalo eyino, Yesu aalamusibwa ne khurura mu silindwa. Nono, kaaba Kristo ne aalamusibwa e ndaalo eye ebweeni eye lichuuma, ne Pendekositi yecha chindaalo kamakhumi karano ne chibirire, aba e ndaalo eya Pendekositi yaaba ndaalo siina? E ndaalo eye ebweeni eye lichuuma. Ne, siina sili siboofof sino khuloondekhana nende e ndaalo eya Pendekositi? Anano, liboofof lili mbo yabechanga khu ndaalo eye ebweeni eye lichuuma ne khu ndaalo eyino, e kanisa eyo Omwami yaanjisibwa. Ne, se lili elino liong’ene tawe. Bibiindu bibiindi bikali biekholekha khu ndaalo eyino bili biboofof. Bioosi alala bieklesia buboofof bwe ndaalo eyino. Bibiindu ebino bili nga: Roho Omutakatifu eecha khu barumwa e ndaalo eyino, kamelwacho ke Elomo Endayi kamataayi kaaba khu ndaalo eyino, babaandu bataayi khuria ne khuloonda Elomo Endayi, baonisibwa mala bataswa khu kanisa bakhola bario khu ndaalo eyino. Nono, e ndaalo niio bibiindu ebino bioosi biekholekelakho se khunyala khwakimocha tawe.

Ng’ali, nio khukhwola ano se khwabone khuli Omwami aarobora e ndaalo eye ebweeni eye lichuuma nga e ndaalo niio babaandu bewe bebusiliakho ne khumusaaaya ku? Bakristo bataayi bebuusia khu ndaalo eyino, ne, nono bakhulesia nisio khukhoya khulolelakho. Lundi baboolelwa mbo bebuusienge khu ndaalo eyino ne baana khu nibio bali nabio. Akano kakhoya khurusia mu mebaasio kefweli liosi liosi likhufwisia kimiooyo khu ndaalo eyino. Khebulila,

Omwami niye owe khunyoa mu khumusaaya ne mu makhuwa koosi. Nilio likila khu ndaalo eye ebweeni eye lichuuma, Bakristo khukhwola bebuusie alala khusaaya, nende lundi khu mukhebulila oyo owabafwila mala aalamusibwa khubela nibo khu ndaalo eye ebweeni eye lichuuma.

KAMAREBO

1. E ndaalo eye khusaaya eli ne buboofu bwosi bwosi?
2. Omwami aarobora e ndaalo niio enya babaandu bewe bamusaayilekho?
3. E Sabato esili e ndaalo niio khwenyebwa khurie?
4. Kamaandike mu 2 Bakorinjo 3, Bakolosayi 2:14, Baeburania 9:16, 17, Baeburania 10:9 nende Luka 24:44 kasomia kali siina?
5. Siina sisiakilanga Paulo ne ebuusia alala nende Bayaudi khu ndaalo eye Sabato?
6. Mu Barumwa 20:7, Bakristo bebuusia alala ndaalo siina eye lichuuma?
7. Kaaba bali e Sabato niyo e ndaalo eye khusaaya, siina sisiakila basuubili balekha khukhwakaanana khu ndaalo ng'eneyo nio bakaanane endaalo eye ebweeni eye lichuuma?
8. E ndaalo eye ebweeni eye lichuuma niio ndaalo siina?
9. Siina sisiakhola e ndaalo eye ebweeni eye lichuuma yaroborwa nga e ndaalo eye khusaaya?
10. Aana e ndaalo niio Bakristo e bu Korinjo benyebwa khukhwakaanani lakho mala baane khu nibio banyoolile mu muruungo.
11. Boolakho mu buleeyi niko elomo "E ndaalo eyo Omwami" eli ne nako.
12. Siina sikila e ndaalo eye ebweeni eye lichuuma ne eli e ndaalo emboofu erio?
13. Kristo aalamusibwa khukhwama mu silindwa ndaalo siina?
14. E naikara eya Pendekositi yabechanga khu ndaalo siina?
15. Boolakho bilala khu biindu bibiekholekha khu ndaalo eya Pendekositi.

LISOMO LIA SABA

SISIEKESIO SIE KHUSAAYA

Musibala sie dini aluno ari, khuli nende chingano chingali che khusaaya. Bakatoliki bali nende engila yabwe busa ne chikanisa chingali che ba Protesitanti choosi chili nende chingila chabwe. Onyala warumikhira kamachuuma kamakali nocha mu chikanisa chichabukhaane mala choosi chisaaya mungila chichabukhana. Khubela siina? Akano niko Omwami enya?

E Bibilia ekhwekesia eli khuli busa nende e kanisa ndala yong'ene mala eli eyo Omwami. (Baefeso 4:4; Matayo 16:18). Sisiekeshio nisio e kanisa eloonda sili mu Ndakaano Embia. Khubela elino lili lia ng'ali, ne lundi khubela e kanisa eyo Omwami niio eboolelwa khusaaya, buli sipupu silaloonda sisiekeshio silala sino.

Kaaba bali khwenya khumanye Omwami enya babaandu bewe bamusaaye mungila siina, khukhwola khuche busa mu Ndakaano Embia. Se elikhoo engila ekiindi niio khunyala khwamanyilamo tawe. Ne khucha mu Ndakaano eyino ekhwekesia akano:

1. Ali Wele yeng'ene niye khukhwola khusaaye.

Kristo ne aaba nakhakwa nende Sietani, aaloma ali, "Olasaaya Omwami Wele wowo mala omukhalabanile niye yeng'ene." (Matayo 4:10).

2. E ndaalo eye khusaaya eli e ndaalo eye ebweeni eye lichuuma.

Basubili baboolelwa khukhwebuusia alala khu ndaalo eye ebweeni eye lichuuma mala baane mbo: "Buli khu ndaalo eyo Omwami buli sia mulala khwinywe khukhwola are alubeka chirupia khuloondekhana nende nisio anyoolile mu muruungo mala muchibiikhe nio mukhenaana khubuusia chirupia ne nichile tawe." (1 Bakorinjo 16:2).

3. Bakristo khukhwola basaaye Omwami.

Khuli nende ako niko khubonelakho khu likhuwa elino: "Barumikhira biise biabwe khukhweyika khukhwama khu barumwa, khumenya alala mu busangaanilo, ne bakabana biakhulia ne khusaba Wele." (Barumwa 2:42). "Khu ndaalo eye ebweeni eye lichuuma, khwebuusia alala khunyoola siakhulia sie busangaanilo. Paulo aaba enyile khurekukha endaalo eloondakho, khwako achiililila khukhwilwachila babaandu khukhwola mu silo akari." (Barumwa 20:7).

4. Khuboolelwa nga khwenyebwa khusaaya.

Kristo aaloma ali, "Ne kakhali esaa elikho yiicha, mala niyo eyino, nimwo abaabo be silukuluku sia ng'ali sie khusaaya Paapa bacha khumusaaya khukhwama mu roho nende mu bung'ali. Bakhamusaaye niye mu bung'ali nga

ne enya. Wele ali Roho, ne abo bamusaaya khukhwola bamusaaye mu roho ne mu bung'ali.” (Yoana 4:23, 24).

5. Bitonyi birano bie khusaaya biboolwa abuwaanga.

Ebino bili alala nende: Khukhweyika khukhwama mu Bibilia (2 Timoteo 2:15), Khusaba Wele (Barumwa 2:42), Khukhwimba (Baefeso 5:19), Lilikolooya lio Mwami (Matayo 26:26-28), nende Khuaana (2 Bakorinjo 9:6, 7). Ebino biong'ene nibio bitonyi bie khusaaya nibio khusoma mu Ndakaano Embia. Nono, khukhwola khukhole ebino biong'ene.

6. Khuboolelwa khuli khwenyebwa khube basuubilwa mu khwakaanana khusaayile alala.

Omuandiki owe Baeburania aaloma ali, “Khukhalekha kumwiima kwe khukhwakaanana alala, nga balala ne balikho ne bakhola tawe. Ne kakhali, lekha khutase khutinyilisiana, nga ne khubona khuli Endaalo eyo Omwami elikho yimbiya.” (Baeburania 10:25).

7. Engila eye khusaaya eli busa enyangu lundi eyeluungikha.

Se lilikho likhuwa lilume khu mundu yesi yesi khusaaya nga lienyebwa tawe. Boosi basabwa basaayile alala nende abo balikho ne basaaya nga lienyebwa.

8. Liliaalwa lie khusaaya liosi liloonda busa kamekizio ke likhuwa lio Omwami.

Khulomaloma burume bwa Wele bwong'ene (1 Petero 4:11). Mbao siosi siosi nisio khukhola ne khukhali nende kumunwa kwa Wele tawe.

E kanisa eya Kristo yabukhana nende chikanisa chichiindi khubela eloondanga sifwaani sie khusaaya sinyoolekhana mu Ndakaano Embia. Elino likila se khuli nende bibiindu bilala mu khusaaya khwefwe bili mu kanisa chichiindi tawe. Bilala nibio khukhali nabio tawe nibio ebino:

1. Khukhwimba khwefwe se khucha nende bibiindu bikhali ne kumuuya bibiipa kimienya tawe. E Ndakaano Embia ekhusomia eli khukhwola khwimbe chinyimbo chifumia Wele. Paulo aloma ali, “Lomaloma buli mundu no wasie kamakhuwa ke kimienya kia Wele ne chinyimbo chindakatifu, yimba chinyimbo ne kimienya khu Mwami ne khumufumia mu miooyo kienywe.” (Baefeso 5:19). Ne kane khwole khu lisomo lie khukhwimba, khulalomaloma mu buleeyi khu likhuwa elino.

2. Se khwikayilanga omundu khulia lilikolooya lio Mwami tawe. Ne kakhali, Paulo aandikila Bakorinjo ali, “Nono, buli mundu akhoyeele anyoe emenieelesie omwene, nio alie kumukaati ne khunywa mu sikoombe sio Omwami.” (1 Bakorinjo 11:28).

3. Se khuaananga sitonyi silala khwikhumi tawe. Lundi Paulo aandika ali Bakristo khukhwola baane nga ne bebaasisie khukhwama mu muruungo

kwabwe. (1 Bakorinjo 16:2).

4. Se khubuusianga chirupia khu ndaalo ekiindi khurusiakho e ndaalo eye ebweeni eye lichuuma tawe. Chikanisa chingali che kimiaukho chibuusianga biise biosi biosi nibio chakaanane, ebeele e ndaalo eye ebweeni eye lichuuma namwe ta. Ne kakhali, Bakristo baboolelwa mbo baanenge khu ndaalo eye ebweeni eye lichuuma yong'ene. (1 Bakorinjo 16:2).

5. Se khuli nende bipupu bibiarebwa busa alubeka mbo nibio bibiimba ne khwebuusisie alala khusaaya tawe. Kamaandike kakhusomia kali buli Mukristo khukhwola embe ne nono sipupu siosi khukhwola simbe. Paulo aaloma ali, “Nono ese khole ndiena? Ndasaba mu roho wase, lundi ndasaba akhaba ne kamebaasio kase, ndemba ne roho wase, lundi nimbe ne kamebaasio kase.” (1 Bakorinjo 14:14, 15).

6. Se khuli ne chindaalo nicho khwara alubeka khuba chichabukhana nicho khusaayilamo nga Easter, Christmas, ne chichiindi tawe. Paulo aakambila basiime e Kalatia ali, “Mukholanga kimilukha kie chindaalo nabulebe, ne kimieesi, ne biise, ne kimiko. Neembelele sikila enywe! Kanyala kaba bali kimilimo kiase khwinywe kioosi kiabele kia busa?” (Bakalatia 4:10,11).

7. Se khulichanga lilikolooya lio Mwami lulala khu mweesi, lulala khu mieesi kitaru namwe lulala khu mwaka tawe. Khulichanga lilikolooya lio Mwami buli e ndaalo eye ebweeni eye lichuuma, buli e ndaalo eye mwichuuma. Mu maandike, khusoma nio Bakristo bataayi baakhola bario. (Barumwa 20:7). Ndaalo siina eye ebweeni eye lichuuma? Naanu owaebwa bunyali bwe khuboola ebe ndaalo siina? Buli lichuuma lili nende e ndaalo eye ebweeni yalio ne khukhwola khulie lilikolooya elino buli khu ndaalo eyino. Khwakaanana khulia lilikolooya lio Mwami buli khase nikho khwakaanana khuaana, khukhweyika kamaandike ne kakaandi.

8. Se khwairakho aasi kimisango kiosi kiosi, namwe kimiima, namwe chingila che khuloondwa ne khwakaanane khusaaya Omwami tawe. Petero aaloma ali, “Sikila mu manyile sisiaruungwa khumulekhuula enywe khurura mu miima kie limenya likhalimo bukhala tawe, nikio mwaelesebwa ne bakuuka benywe, se siaba sisiindu sinyala sionakwa nga efwesa namwe esahabu tawe.” (1 Petero 1:18). Paulo atasakho ali, “Nono, mukhalekha yesi yesi amubea enywe ne kamayiingano busa tawe. Kamayiingano ako kanyala kakholekha khuba ke limanya, ne kakhali kamekisiko ke babaandu niko. Ke bunyali bwe mu sibala muno busa, se kali ka Kristo tawe.” (Bakolosayi 2:8).

9. Se khuloondanga khu mekisiko ne kamalaka ke babaandu tawe. Omurumwa aandika ali, “Mwafwa ne Kristo mala mwalekhuulwa khukhwama khu baroho ba bamiia mu limala. Siina sikila nono, ne mu menya nga be

sibala sino? Siina sikila ne muria kamalaka nga, “Mukhatiila khu sino tawe, mukhachanjaama esio tawe”, namwe “Mukhetiila khu siindu esio tawe”? Akano koosi kali busa khu biindu bitaamba bukhala ne bimalile khurumikhirwa. Akano kali kamalaka ne kamekisisio ke babaandu busa.” (Bakolosayi 2:20-22).

10. Se khuloondanga lilaka lie mu Ndakaano Ekhale mu khusaaya tawe. Bakali bachichanga khu Lilaka lia Musa nio banyoole bibiindu nga e Sabato, sitonyi silala khwikhumi, bibiindu bibiipa kimienya, ne bibiindi. Ne, khukhola khurio khuli khurumikhira kamaandike ako buubi. Lilaka lia Musa se likhuruka efwe aluno ari tawe. (2 Bakorinjo 3; Baeburania 10:9; Yoana 1:17).

Khwako, khwenyebwa khuloonde Endakaano Embia buli lwoosi bukhatasakho, khurusiakho namwe khuramo liliefwe mu bweyaangu bwe lilimo lia Wele tawe. (Lifunulwa khu Yoana 22:18,19; Bakalatia 1:7-9). Endakaano eyino eli nende akaako koosi niko khwenya nio khukhole buli siindu sili silayi. (2 Timoteo 3:16,17). Buli nisio khwenya nio khusaange mu luyali ne bulayi bwewe Omwene sili mu Ndakaano Embia eyino. (2 Petero 1:3).

Kaaba bali babaandu boosi balakalukhila sifwaani sie khusaaya esino, alala nende koosi niko baloma ne khukhola mu lisina lie dini, aba nono kane khube nende buambani. Lili lia abuwaanga mbo Omwami se kamboolela ese saaye mu ngila eyino ne ewe mu ngila ekiindi tawe. Ne kakhali enya fweesi khusaaye mu khufwaanana. Ne elino linyalikhana busa ne kaba bali khulaloonda sifwaani sia ng’ali nisio aana mu Ndakaano Embia.

KAMAREBO

1. Siina sikila ne khuli nende chingila chingali che khusaaya?
2. Khusoma khuloondekhana nende chikanisa chinga mu Bibilia?
3. E kanisa eli eya naanu?
4. Khunyoola waena sifwaani sie kanisa?
5. Siina nisio khulanyoolamo nga sifwaani sie khusaaya?
6. Naanu niye owenyebwa khusaaywa?
7. Aana e ndaalo eye khusaaya.
8. Naanu owenyebwa khusaaya Wele?
9. Khwenyebwa khusaaye khuriena?
10. Aana bitonyi birano bie khusaaya.
11. Siina sikila ne khukharumikhiranga bibiindu bibiipa kimienya mu khusaaya tawe?
12. Khulia lilikolooya lio Mwami mu khwikayilana nisio siina?
13. Khwenyebwa khubuusia chirupia khenga?
14. Siina sili siibi khuba ne babaandu barobore be khukhwimba?
15. Siina sikila ne khukhali nende chindaalo chikhongo nga Christmas nende Easter nicho khuria tawe?
16. Bakristo benyebwa khulia lilikolooya lio Mwami khenga?
17. Kamekizio ne kamalaka ke babaandu niko malala siina?
18. Babaandu bo Mwami baloondanga Endakaano Ekhale nga lilaka liabwe?
19. Khwenyebwa khubukule Endakaano Embia khuriena?
20. Linyalikhana khuba nende bulala mu dini? Mungila siina?

LISOMO LIA MUNANE KHUKHWEYIKA E BIBILIA

Silala khu bitonyi bie khusaaya nibio khunyoola mu Ndakaano Embia sili khukhweyika e Bibilia. Khuboolelwa mbo khukhwola khweyike, ne lundi khubona mbo Bakristo bataayi bakaananga ne beyika mu khusaaya khwabwe.

Khukhweyika e Bibilia khunyala khwakholwa biise biosi biosi nende omundu mulala namwe bakali. Anaano, khulikho khulomaloma khu khweyika nikhwo khukhola ne khwebuusisie alala khusaaye Wele endaalo eye ebweeni eye lichuuma. Ne khukhola khurio, Omwami alomaloma nafwe khubirira mu likhuwa liewe.

Sitonyi sie khusaaya esino sinyala khukholwa khubirira mu khusoma ne khukhweyika kamaandike namwe mu khuulila omundu ne elwacha khukhwama mu likhuwa lia Wele. Mu Barumwa 20:7, khubona mbo Paulo elwachila basiime e Turoa ne bebusia alala khusaaya. Mu Barumwa 17:10-12, khusoma khuli, “Oli mu silo, basuubili babukula Paulo ne Sila ba bayila e Berea. Nga boolayo bacha mu sinakooki. Babaandu be bweneyo baba barekerefu khukhila be Tesalonike. Barekeeresia burume obwo ne silukuluku sikali, ne bamenielesia kamaandike kamatakatifu buli ndaalo, nio bamanyilisie kaaba bali niko Paulo ne Sila balomanga kaba kang’ali. Bakali khu nibo basuubila, ne bakhasi Bakiriki be liiria ne babaandu boosi basuubila.” Kristo aasomia ali, “Mu menielesia kamaandike sikila mwibaasia muli mulanyoolamo bulamu bwa mindali. Ne kamaandike akano ne kamene kaboola khwise.” (Yoana 5:39).

Paulo achuuba omwilwachi omuraka Timoteo ali, “Khaka nga onyala ofukiililwe mu moni cha Wele nga omukholi okhaambwa chisoni khu milimo kiewe tawe, oyo owikisianga Elomo eye bung’ali eya Wele nga eli.” (2 Timoteo 2:15). Kristo aaloma ali, “Baali ne njala ne bulesia bwe khuuba baluungi bali ne chikhabi, sikila Wele akhabekusie.” (Matayo 5:6). Lundi aaloma ali, “Omundu se alamenya khulwe siakhulia siong’ene tawe, ne kakhali amenya khulwe buli Lomo niio Wele aloma.” (Matayo 4:4).

Lili lie bukhala po mbo khweyike, ne lundi khukhwola khweyike akaako kali kakenyekha. Omurumwa Paulo alomaloma khu melwacho ne kamekisio niko khuulilanga ali, “Khwako, lisuubila liamanga mu khuulila burume, ne burume bwichanga khubirira mu khwilwacha Kristo.” (Barumi 10:17). Elino likhwekesia lili khwaulila ako kakhali kang’ali tawe, kane khusuubile ke bubeeyi ako, kaaba bali se kane khuenje bung’ali niio buli tawe. Ne, khwaulila bung’ali, kane khusuubile bung’ali bwene obwo.

Mu ndaalo chimaliilisi echino, Wele alomaloma nafwe khubirira mu

Mwana wewe Yesu Kristo. (Baeburania 1:1, 2). Khu sikulu nikhwo Yesu aakaluukhanilakho lukoondo, Wele Omwene aaloma khu Yesu ali, Oyuno ali Omwana owase omusiime, ousiimisia lukali; khe mumurekeeresie.” (Matayo 17:5). Kristo naye aalomalomanga likhuwa lia Wele. “Yesu amukobosia ali, ‘Yesi yesi ousiima ese alaria kamekasio kase. Paapa wase alamusiima mala niye alala ne nase khulecha niio ali khumenye naye. Yesi yesi okhasiima ese saria kamekasio kase tawe. Ne kamekasio niko mumalile khuulila se kali kakaase samwene tawe, ne kakhali kaama khu Paapa owanduma.” (Yoana 14:23, 24). Lundi buloli obuno bwaandikwa: “Yesu akhola kamayia kakaan-di kamakali ebweeni we babeeka bewe kakhaandikwa mu sitabu esino tawe. Ne kano kaandikwa nio mwole khusuubila muli Yesu ali Kristo, Omwana owa Wele, ne khubirira mu lisuubila mu lisina lieve mwoole khuba ne bulamu.” (Yoana 20:30, 31). Khutasakho, kamaandike koosi kama khu Wele ne kumuuya kwewe, ne kakhola oyo okhalabanila Wele abe nende bioosi nibio enya nio akhole buli siindu sili silayi, khubela kamaandike ke Ndakaano Embia kali lilaka lilichufu lileelesiana babaandu bulekhule. (2 Timoteo 3:16, 17; Yakobo 1:25).

Bona oli koosi kabira ako kali ka ng’ali. Nono, khuli ne bifuno bikali bikila khwebuusie alala khu ndaalo eye ebweeni eye lichuuma mala khweyike likhuwa lia Wele:

1. Khukhwola khukhole khurio khubela lili likhuwa lia Wele. (Baeburania 13:7; 1 Petero 1:23; Baefeso 6:17). Lili likhuwa lilayi lie khuukia mbo Omwami se aakhulekha mu siilima tawe ne kakhali aakhwekesia lilienya lieve.

2. Khukhwola khwenye khumanya lilienya lia Wele mu bwichufu. (Barumwa 13:7). Khwako, kili kimilimo kiefwe mbo khweyike mala khumanye. Wele aakhuelesia efwe bukesi, ne khunyala khwasoma mala khweyika nio khumanye lilienya lio Omwami fwabeene.

3. Khukhwola khwenye khukhweyika nio bakhakhubea tawe. (Baefeso 4:14; Baefeso 5:6; Yakobo 1:22). Khuli nende kamakhuwa kamakali po niko babaandu basomesebwa eno ne baboolelwa mbo ke Bukristo niko. Khunyala khwamanya khuriena kaaba ne kali ka ng’ali namwe ta? Khunyala khwamanya busa kaaba ne khulafwaanania niko khuulila khu likhuwa lia Wele. Yoana akhukaambila ali khukhake chiroho namwe babelwachi nio khumanye kaaba ne bali ba Wele namwe tawe. (1 Yoana 4:1). Se silikhoo sikila omundu aombakasibwe ne bubeeyi tawe kaaba bali alachiililila khuenja bung’ali mu likhuwa lia Wele.

4. Khukhwola khwenye khukhweyika mala khumanye lilienya lia Wele khwole khu sikelo sie khukhwekisia nafwe babaandi. Paulo aaloma ali, “Weyaye

wamwene ne khuliinda kamekisiyo kowo. Chiililila khukhola akano, sikila noka-khola, oleonia wamwene ne naabo bakhurekeeresianga ewe.” (1 Timoteo 4:16). Khuloondekhana ne niko Bakristo bataayi bakhola, buloli buboola buli, “Basuubili basalanila bacha buli abuundu ne belwacha Elomo Endayi.” (Barumwa 8:4).

Ne khuchiililila, lekha khukobolekho enyuma khu 2 Timoteo 2:15 niio Paulo aboola ali khukhwola khweyike khube bakholi babekisianga Elomo eye bung’li nga ne eli. Mu khusoma khwefwe, khukhoya khukhole busa khurio. Khunyoola mbo e Bibilia eli Ndakaano Ekhale ne Embia. Mu Ndakaano Ekhale khulimo nende kamalaka ke Bapaapa nende ka Musa, ne akano se kali ke Bakristo tawe. Mu Ndakaano Embia, khulimo nende lilaka lia Kristo. Mu ngila ekiindi, e Ndakaano Ekhale yaaba eye babaandu babamenya Kristo na khecha mala afwa tawe, ne, elino nilio likila e Ndakaano ndala ne eli ekhale ne ekiindi embia. Ne, efwe khuli waena? Efwe khumenyile biise nibio Kristo amalile khukhufwiila khumusalaba. Nono, khumenyile aasi we lilaka lia Kristo lili mu Ndakaano Embia. (Baeburania 9:16, 17; Baeburania 10:9).

Lirebo lirebwanga nono lili kaaba ne khusuubila mbo e Ndakaano Ekhale eli likhuwa lia Wele. Likobosia lili mbo khusuubila khurio. Ne, lili mbo, lilaka lie mu Ndakaano Ekhale se lili nilio efwe aluno ari khurukwa nalio tawe. Ne nono, siina sikila khusome ne khukhweyika e Ndakaano Ekhale? Bilala khu bifuno bili ebino:

1. Nio khumanye libaang’ana nende lirakikha lie biise.

2. Nio khumanye lukano lwo omundu nende nga Wele ne akeenda ne naye.

3. Khubela omurumwa Paulo aboola ali Endakaano eyino eli silolelo khwifwe. (1 Bakorinjo 10:6). Ne bung’ali buli mbo elimo bilolelo bikali po.

4. Khulimo nende kamakhuwa ke khusuubilwa ne khuloondwa kamakali kaali kang’ali aluno ari nga busa ne kaaba biise nibio Wele akaana. Ne kakhali se kali lilaka liefwe tawe.

5. Nio khumanye khuli khumenyile aasi we lilaka lilayi litumakho, ne lundi mbo khuli ne lilieyikina liboofu litumakho. (Yoana 1:17).

Nono, nio khweyike likhuwa lia Wele mu ngila endayi, ne lundi nio khunyale khuliboola nga ne lili, kalio kamalaka niko khukhwola khuloonde:

1. Soma liaandike nilio wenya khukhweyika ne wililamo kamakhabi khutumakho lilala.

2. Soma akaako kasira liaandike nilio wenya khukhweyika---kaali enyuma we liandike elio nende ebweeni walio.

3. Naanu owaloma liaandike elio?

4. Alikho aboolela naanu?

5. Likhuwa elielio lialomwa biise siina?

6. Liaandike elio lili nga lukano namwe lili lie kamakhuwa kalio busa abwene nga ne kaandikwa?

7. Liaandike elio liaanwa nga lilaka nilio khukhwola liloondwe?

8. Liaandike elio lili ne bukhala khu buonia bwefwe biise ebino?

Lundi, bibiindu bibiindi nga ebino binyala biayeeta khukhweyika khwefwe: Chi Bibilia nicho bakalukhasi bababukhaane bakalukhasia mu Lungeresa, Sitabu siboola bifuno bie kamakhuwa kanyoolekhana mu Bibilia, Sitabu sisiieklesia ao niio likhuwa nilio wenya linyoolekhana mu Bibilia, Bitabu biaana mu bu balaayi kamebaasio ke basomi be liiria khu makhuwa ke mu Bibilia, ne bibiindi. Angaaki wa koosi, liboofu lili mbo oweyika asome ne khukhweyika e Bibilia mu khu saba. Babaandu bakali bamanyile kamakali khu Bibilia ne makekhe po khu ka kilimo.

Nga ewe ne nase khukhola nilio Omwami enya khukhole mala ne khwebuusia alala ne batakatifu babaandi buli khu ndaalo eye ebweeni eye lichuuma ne khweyika likhuwa liewe, khucha khunyoola limanya lie Bibilia licha khukhuyeeta khukhula ne khubalaa nga Bakristo ne benyebwa. Boosi bamala bakhola likhuwa elino, e kanisa echa khuba ne kamaani khukhilakho, ne lundi aba manya khucha khunyala khukhwekisia basaale befwe bali mu chi dini mbo lili busa likhuwa lia Wele liong'ene likhuonia ne khukhuambasia efwe.

KAMAREBO

1. Naanu banyala beyika e Bibilia?

2. Khunyala khwaulila likhuwa lia Wele mu ngila siina?

3. Siina sisiakila babaandu be Berea ne baaba barekerefu khukhila be Tesalonike?

4. Kristo aaloma ali siina mu Yoana 5:39?

5. Boola nga 2 Timoteo 2:15 ne siboola.

6. Naanu niye Kristo aaloma mbo ali ne chikhabi ne akhekusibwe?

7. Omundu anyala amenyela siakhulia siong'ene?

8. Lisuubila lichanga liriina?

9. Lilala siina liliekholekha kaaba ne khuulila kakhali ka ng'ali tawe?

10. Wele alomalomanga nende babaandu mu ngila siina aluno ari?

11. Siina sisiakila kamekizio ka Yesu Kristo kaandikwa mu sitabu?

12. Soma 2 Timoteo 3:16, 17 nende Yakobo 1:25.

13. Boolakho bilala khu bifuno bikila khwebuusie alala mala khweyike e Bibilia.

14. Khukhwekisia Elomo eya ng'ali eya Wele nga ne eli nikhwo khukhola siina?

15. Kamalaka kamakhabi kataru kali mu Bibilia niko malala siina?

16. Efwe khumenyile asi we lilaka siina?

17. E Ndakaano Ekhale eli ne likhuwa lia Wele ku?

18. Siina sikila khweyike kali mu Ndakaano Ekhale?

19. Aanakho malala khu malaka niko khukhwola khuloonde biise nibio khweyika e Bibilia.

20. Biindu siina bilalakho binyala biakhuyeeta khukhweyika e Bibilia?

21. Limanya lie Bibilia likhuyeeta mungila siina?

LISOMO LIA TISA LISABA

Sitonyi sisiindi sie khusaaya mu Ndakaano Embia sili khusaba. Biise nibio Bakristo bataayi bebuusianga alala, silala khu nibio bakholanga siaba khusaba. E kanisa ne yamala busa khukhwanjisibwa, ao ne nao buloli buboola buli, “Barumikhira biise biabwe khukhweyika khukhwama khu barumwa, khumenya alala mu busangaanilo, ne bakabana biakhulia, ne khusaba Wele.” (Barumwa 2:42). Buloli ne buboola buli, “ne khusaba Wele” bwekesia mbo elino liaba likhuwa liboofu mu khusaaya.

Likhuwa khusaba liekesia khucha ebweeni mu bweyangu bwo okundi, khukhwima akari mu khurera kumuleembe, khukhwinaamila namwe busa khulomaloma khu Mwami. Se kali busa bali khusaba ne khwebuusisie alala e ndaalo eye ebweeni eye lichuuma yong’ene tawe, ne kakhali khukhwola khusabe buli lwoosi mwimenya liefwe. Paulo aandkia ali, “Saba mu roho biise bioosi, ne musaba buyeeti bwa Wele. Ba meeso ne liliekhalilikha, musabile babaandu ba Wele boosi.” (Baefeso 6:18). Lundi aaloma ali, “Saba biise bioosi.” (1 Batesalonike 5:17). Eline mu bwimbi liekesia mbo khukhwola buli lwoosi omundu abe ne kumwoyo kwe khusaba.

Nga ne khulola khu likhuwa liboofu elino, kha khulole khu kalimo kamakhongo:

1. Khusaba khuli, mu bukali, khwe Bakristo namwe babaana ba Wele.

Eline se liekesia mbo bakhali Bakristo se banyala basaba tawe, namwe se bakhoyele basaba tawe. Kamaandike kaboola abuwaanga mbo lisaba lili bukoote ne lundi ekhabi eye Bakristo. Khusoma khuli, “Khumanyile khuli Wele se arekeeresianga babooni tawe; arekeeresianga babaandu bamuria ne khukhola niko niye enya.” (Yoana 9:31). Nono, lola akaako niko Wele araa niko khukhwola omundu akhole nio lisaba liewe liulilwe---khukhwola abe asaayanga Wele, ne lundi abe akholanga niko niye enya. Naanu okholanga akano? Omukristo yeng’ene. Ne nono, omwooni anyala asaba siina? Se anyala asaba ali Omwami amubeele bubwooni bwewe tawe khubela Kristo aaloma ali khukhwola omundu asuubile mala abatiisibwe nio aonisibwe. (Mariko 16:16). Se anyala asaba lisuubila tawe khubela khwaelesebwa kamaandike ne khubirira khu niko, khunyoola lisuubila. (Yoana 20:30, 31; Barumi 10:17). Lundi se silikhoo nisio anyala asaba naali omwooni tawe.

Nga ne khusoma mu Ndakaano Embia, khusoma kamaandike kamakali kalomaloma khu lisaba ne mala lundi khubona mbo koosi kalomaloma khu

Mukristo. Omukristo ali omwana owa Wele khubela aaria ne khukhola ako niko Wele enya (Bakalatia 3:26, 27), ne nono ali nende ng'ali eye khumu-laanga ali Paapa wewe. (Barumi 8:15). Abaanga bali buli mundu anyala busa oolela Paapa mu lisaba, sinaanu nisio Omukristo alakhililakho omwooni? Khubona nono mbo Omukristo ali ne bukooto bwe lisaba, mala obuno buli ndala khu khabi cha roho nicho anyoola. (Baefeso 1:3).

Aluno ari, khuli nende kumwiima kwe babooni khusaba sibeelwa sie bubwooni bwabwe ne mala bali aba baba Bakristo. Eline se linyoolekhana mu liukhuwa lia Wele tawe. Lili busa mu mekasio ke babaandu.

2. Kamasaba kefwе khukhwola kayililwe Wele khubirira mu Yesu Kristo.

Wele niye Paapa ne niye omuani owe bibiindu bioosi. Lili lilayi mbo khumusabe khulwe buyeeti ne lundi khumusiima khubela chikhabi nicho khunyoolile khale khukhwama khu niye. Ne kakhali, se khunyala khwacha ebweeni wa Wele fwabeene fweng'ene tawe khubela bubwooni bulio akari wefwе ne naye. Lubeka luluundi, se liekesia mbo khwenyebwa khuenje omundu nasilebe, kakhaba omukhongo ariena, nio eme akari wefwе nende Wele tawe. Kristo niye okhuambasia, okhwimila efwe akari, okhusabila mu bweyaangu bwefwe, ne khubirira mu niye, khwicha ebweeni we ndebe yewe eye kumwalaalo. Rekeeresia likhuwa lia Wele, “Baana base, ndikho muandikila enywe, nio mukhakhola murio mwakhola bubwooni tawe; ne omundu yesi yesi aba nakhola bubwooni, khuli no Omundu okhusabila khu Paapa mu bweyaangu bwefwe, niye Yesu Kristo, oli omuluungi. Ne Kristo Omwene niye engila niyo bubwooni bwefwe bubeelwangakho, ne se buli bubwooni bwefwe bwong'ene tawe, akhaba bubwooni bwa buli mundu yesi yesi.” (1 Yoana 2:1, 2). Lundi, “Sikila Wele ali mulala, ne oreeranga Wele ne babaandu alala ali omundu mulala, Yesu Kristo.” (1 Timoteo 2:5). Khwako, khukhwola buli lwoosi khusabe khubirira mu lisina lia, namwe mu bunyali bwa, Yesu Kristo. (Matayo 28:18).

3. Khukhwola khusabe mu roho ne mu bung'ali.

Khwakhabona mu masomo kabirire khuli Omwami aaloma ali khukhwola khusaaye Wele mu roho nende mu bung'ali. (Yoana 4:24). Ne khubela lisaba lili sitonyi sie khusaaya, ne lundi sitonyi sie limenya lia buli nyanga lio Omukristo, kamasaba kefwе khukhwola kabe mu roho ne mu bung'ali. Paulo aandikila Bakorinjo ali, “Ne naaba ne saba mu lulimi lukhamanyikhane tawe, aba roho wase asaba, ne kamebaasio kase se kali siimbi tawe. Nono, ese khole ndiena? Ndasaba ne roho owase, lundi ndasaba akhaba ne kamebaasio kase, ndemba ne roho owase, lundi nimbe ne kamebaasio kase.” (1 Bakorinjo

14:14,15). Liekesia mbo kamasaba kefwе khukhwola kabe nende kamebaasio kefwе, mbo niko khwibaasia kakhoya kabe niko khulomaloma, ne lundi khukhwola khwiboombie mala khube ne kimiooyo kiluungikhe biise nibio khusaba. Khuloondakho, kamasaba kefwе khukhwola kabe kaloonda likhuwa lia Wele, mbo kali sisiindu silala ne natio. Se khukhoya khusabe Omwami akhole sisiindu sikhali nisio lilienya liewe liboola tawe. Kristo lulala aaloma biise nibio balala khu beeka bewe basaba sikhenyekha tawe ali, “Ne kakhali Yesu amukobosia ali, ‘Se mwamanyile nisio mulikho musaba tawe. Enywe munyala khunywa sikoombe sie buchuuni nisio ese ndi siimbi khunywa?’” (Matayo 20:22). Lundi aaloma ali, “Lundi liaandikwa lili, ‘Okhakhaka Omwami Wele wowo tawe’.” (Matayo 4:7).

Esino nisio sifuno silala sikila ne khukhanyala khwasaba “Lisaba lio Omwami” tawe. (Matayo 6:9-13). Bubwami bwecha khale, (Baeburania 12:28), ne nono se linyala liaba lilienya lio Omwami mbo khusabe khuli bwiche tawe.

4. Akaako niko khwenyebwa khusaba kali mu maandike mu ngila eya abuwaanga.

Khwenyebwa khusabe kamasaba ke khukhupila Wele orio. “Mukheembelela khu siindu sisi sisi tawe, ne kakhali mu masaba kenywe koosi reeba Wele nisio mwenya, buli lwoosi mureebere mu mwoyo kwe khumupila niye orio.” (Bafilipi 4:6).

Khwenyebwa khusabe biise nibio khuli ne butinyu. “Nio Petero aarama mu siboe, ne kakhali e kanisa yachiililila khusaba Wele ne kumwoyo kwoosi.” (Barumwa 12:5).

Khwenyebwa khusabile baruki be sibala. (Barumi 13).

Khwenyebwa khusabanile. “Khwako khe mwiyananile bubwooni bwenywe mala musabanile nio muone. Lisaba lio omuluungi lili ne kamaani lundi likholanga ke khuukia.” (Yakobo 5:16).

Khukhwola khusabile abo balwaala. “Alio yesi yesi oli omulwaale? Akhoya arumanie basaakhulu be kanisa, balamusabila mala bamuakhe kamafura mu lisina lio Omwami. Lisaba elino ne bakholela mu lisubila lilaonia omulwale. Omwami alamuonia lundi omulwaale oyo ne ali ne bubwooni alabeelwa.” (Yakobo 5:14, 15).

Khunyala khwachiililila khusoma kamaandike kalomaloma khu biindu bikali nende babaandu nibo khwenyebwa khusabila. Mu biindu ebino khuli nende e kanisa, abaabo be chiinju chefwе, babatiba, ne bibiindi.

5. Kamaandike lundi kakhuelesia likambila khuloondekhana ne lisaba.

Kristo aloma ali, “Lundi ne osaba, okhaba nga ba bacha tawe! Sikila basiima khukhwima ne khusabila mu masinakooki, nende niio chingila chakaanila nio babaandu ba babone. Ng’ali ese muboolela enywe ndi, bamalile khunyoola siianwa siabwe. Ne kakhali ne osaba, cha mu lusiro lwowo, wikaleyo lulwiiki mala osabe Raraao oli mu bwikisi ne Raraao chana oyo obonela mu bwikisi alakhuelesia siianwa abuwaanga. Ne muli mwisaba mukhechusia kamakhuwa ka busa nga babaandu bakhamanyile Wele tawe, sikila nibo bebaasia bali baulilwa sikila kamakhuwa kabwe kamakali. Mukhaba nga nibo tawe. Sikila Raraawenywe amanyile nibio mwenya ne musii-li khumureeba tawe.” (Matayo 6:5-8). Lundi aakambila ali, “Sikila enywe ne mubeela babaandu kamabi kabwe, akhaba Raraawenywe owe mwikulu yesi alamubeela enywe. Ne kakhali ne mukhabeela babaandu kamabi kabwe tawe, akhaba Raraawenywe yesi se amubeela enywe kamabi kenye tawe.” (Matayo 6:14, 15).

Nono, mukhumaliilisia, lisaba lili likhuwa liboofu ne khwebuusisie alala khusaaya nende mu limenya lio Omukristo. Nga Bakristo, khuli ne bukoote bwe khusaba Wele biise bioosi. Khuloondekhana nende khusaya, Bakristo se banyala bekhala busa engo bukhebuusia ne babasiabwe mala basabe Wele tawe. Lili busa nga ne bakhanyala bekhala engo mala baana khu nibio bali nabio namwe balilayo lilikolooya lio Mwami tawe. Bakristo ba kane bebuusie alala khusaaya lundi kane basabe ne bali engo. Ne abaabo bakhalebuusia alala basaaye Wele tawe se balasaba Wele ne bali engo tawe. Ne bakhasaba, lisaba liabwe se lilaba ne buyeeti tawe khukhwola nga ne kane babe basuubilwa khu Mwami.

Saba mu lisubila---saba ne mulaebwa. Lisaba lili ne kamaani.

KAMAREBO

1. Boola likhuwa “lisaba” nisio siina.
2. Lisaba lili nende bukhala siina mu limenya liefwe?
3. Khwenyebwa khusabe khenga?
4. Lisaba lili bukoote bubwaelesebwa baandu siina?
5. Soma mala oboolekho mu buleeyi likhuwa lili mu Yoana 9:31.
6. Omwooni anyala asaba siindu siina?
7. Omukristo niye naanu?
8. Naanu onyala esenda siimbi nende Wele mu lisaba?
9. Omundu omwooni anyala aonisibwa khubirira mu lisaba?
10. Biise nibio khusaba Wele, khubirira khu naanu?
11. Yesu aabele siina khwifwe?
12. Boolakho mu buleeyi khusaba mu roho nende mu bung’ali nisio siina.
13. Kanyalikhana omundu khukhaka Omwami khubirira mu lisaba?
14. “Lisaba lio Mwami” nilio siina?
15. Siina sikila khulobe khusaba lisaba elino?
16. Boolakho bibiindu bilala nibio khwenyebwa khusaba.
17. Naanu balalakho nibo khwenyebwa khusabila?
18. Aanakho kamakaambila malala ko Omwami khuloondekhana ne lisaba.
19. Bakristo banyala bekhala busa engo mala basaba Wele bukhebuusia alala ne babasiabwe khu ndaalo eye khukhwebuusia alala tawe?
20. Khwenyebwa khusabe mungila siina?

LISOMO LIE LIKHUMI KHUKHWIMBA

E dini eye Bukristo eli e dini e yimba. Khukhwimba khuli silala khu bitonyi bie khusaaya bili mu Ndakaano Embia. Mu lisomo liliimbi elino, lekha khuloleelele mu bu balaayi khu sitonyi siboofo sie khusaaya Wele esino.

Sitaayi, lekha khubone kamaandike kakaabukhane kalomaloma khu likhuwa lie khukhwimba:

1. “Nga bamala khukhwimba kumwenya, bacha khu sikulu sia Miseituni.” (Matayo 26:30).

2. “Oli embi mu silo akari, Paulo ne Sila baba ne basaba ne khukhwimba kimienya kifumia Wele, baboe babaandi baba barekeeresie.” (Barumwa 16:25).

3. “Ne khukhola akhaba be Chikholo banyale khufumia Wele khulwe siisa siewe. Nga liaandike liboolanga lili, ‘Nono khukhakhufumie ewe mu be Chikholo. Ndimba efuma eye lisina liowo’.” (Barumi 15:9).

4. “... ndemba ne roho wase, lundi nimbe ne kamebaasio kase.” (1 Bakorinjo 14:15).

5. “Lomaloma buli mundu no wasie kamakhuwa ke kimienya kia Wele ne chinyimbo chindakatifu, yimba chinyimbo ne kimienya khu Mwami ne khumufumia mu miooyo kienywe.” (Baefeso 5:19).

6. “Elomo eya Kristo mu buiinda bwayo bwoosi ekhoya emenye mu miooyo kienywe. Yekisiana ne khukambilana ne limanya lioosi. Yimba kimienya ne chinyimbo choosi chindakatifu, yimbila Wele ne khumupila niye orio mu miooyo kienywe.” (Bakolosayi 3:16).

7. “Aboolelanga Wele, ‘Ndaboolela bawandaayase niko wakholile; kha-khufumie ewe mu mienya mu sikhasio siabwe’.” (Baeburania 2:12).

8. “Alio yesi yesi mwinywe oli mu butinyu? Akhoya asabe Wele. Alio yesi yesi oli omusangaafu? Akhoya afumie Wele mu mienya.” (Yakobo 5:13).

9. “Bemba kumwenya kumuya...” (Lifunulwa khu Yoana 5:9).

10. Baba balikho bemba kumwenya kumuya ebweeni we ndebe....” (Lifunulwa khu Yoana 14:3).

11. “Baapa ne khukhwimba lulwimbo lwa Musa, omukholi owa Wele, ne kumwenya kwe limeeme...” (Lifunulwa khu Yoana 15:3).

Mu Ndakaano Embia yoosi, akano niko kong’ene kamaandike kalomaloma khu lomo eye khukhwimba. Libonekhana nono bulayi Omwami enya siina khu likhuwa elino. Liosi liosi litumakho namwe liboombelelwakho aba lili enje we likhuwa liewe.

Khu baandu be dini bakali, khukhwimba buli bukhino, ne bukhino buli bwe bibiindu bibiipanga kimienya. Khwako, kimikaanda kimikali kie dini kirumikhira bibiindu ebino mu khwimba khwabwe. Liakhaba mbo fweesi khufukiilisi-ana khuli khukhwola khube nende khukhwimba mu khusaaya khwefwe, fweesi se khufukiilisi-ana khuli khube nende bibiindu bibiipanga kimienya mu khwimba khwefwe tawe. E Bibilia eloma eli siina? Esomia khukhwimba khwong'ene namwe khukhwimba alala ne khurumikhira bibiindu bibiipa kimienya? Kanyalikhana khusaaya bukhaba ne bibiindu bibiipa kimienya mu khwimba tawe? Kanyalikhana lundi khusaaya ne khuli nabio? Kanyalikhana mbo khunyala khwakhola liosi liosi khu kabili ako? Lekha khubone.

Khubona khuli omundu anyala khukhwimba mungila chibili: khurumikhira kumumilo kwong'ene nende khurumikhira bibiindu bibiipa kimienya. Khukhwimba ne kumumilo khuli khurumikhira chinjasi chefwe chong'ene, mala chirusie kimimilo nga ekhuungu ne chibiramo. Khukhwimba okhuno khwama mukarikari mwo mundu ne khuli nende bulamu. Khwama mu nisio Wele Omwene abuumba. Lilomekhanga mbo khukhwimba khuli khulayi lundi khu khwang'ona po khuli okhwo khukhwama mu mimilo kie babaandu ne kitubanile. Khukhwimba nende bibiindu bibiipa kimienya khuli busa khukhuundi ne se khufwaanankho nende okhwo tawe. Bibiindu bibiipa kimienya ebino biang'oonwa nende omundu. Bili binyifu, se bilimo bulamu tawe, lundi se bilimo roho namwe kimiooyo tawe. Sifuno siong'ene sikila birusie kimimilo sili khubela mbo omundu alikho abiipa, akhabibuta, namwe alikho abifuamo kumuuya, khuloondekhana nende siina nisio omundu oyo ali nasio. Wele se aabing'ona tawe. Omundu niye owabing'ona. Bili bibukula bubweyaangu bwe esio nisio Wele enya. Nono, Wele enya silala siina? Omuandiki owe Baeburania aaloma ali, "Nono, lekha efwe biise bioosi, khuanenge efuma khu Wele, nga embosio yefwe khubirira mu Yesu, siaanwa sie kiminwa kimwiyamanga niye nga Omwami." (Baeburania 13:15).

Babekisia babamanyikha lukali mu miko kibirire bakhasomiakho bali babaandu barumikhire bibiipa kimienya mu khwimba khwabwe tawe. Ne kakhali, baasomia bali babaandu bembe busa nga e Bibilia ne eboola. Khubonekho malala niko baloma:

1. John Wesley: "Se nikayilakho bibiindu bibiipa kimienya munju chefwe che khusaaya tawe. Lili mbo bikhaulilikhana namwe khubonekhana tawe." (Clark's Commentary, Vol. IV, p. 686).

2. John Calvin: "Khurumikhira bibiindu bibiipa kimienya mukhwikhoyela chifuma cha Wele se khukhilakho khukhwenya khusaamba bupaani, khusaamba chitaa nende khukobosia bibiiniini bie kamakhuwa kali mu Lilaka

tawe. Abaabo be kumukaanda kwa Baptist, mubusilu, babukula bibiindu ebino, nende bibiindi bikali, khukhwama khu Bayaudi.” (John Calvin’s Commentary, Thirty-Third Psalm).

3. Martin Luther: Aalaanga sisiipa kimienya ali “Simanyisio sia Baali”. (McClintock and Strong’s Encyclopedia, Music, Vol VI, p. 762).

4. Adam Clarke: “Khukhwimba khuli bukesi, ne nakhuelesia liiria ne lundi nakhusiima, ne kakhali bibiindu bibiipa kimienya munju eya Wele nabio nabibiiyila lukali. Khurumikhira bibiindu ebino khuli khura kumusilisili mukhwimba. Ne ano ndikho nekesia khuloba khwase khwe bibiindu bibionaka khusaaya khwefwe khwo oyoyo oli lirakikha lie Bukristo.” (Clarke’s Commentary, Vol. IV, p. 686).

Khulio nende babekisia be Bibilia bakali babasuta kimimilo kiabwe angaaki mu khuloba bibiindu bibiipa kimienya mu khusaaya. Ne, likhuwa elino liarakikhila waena? Liarakikhila mu kanisa eya Katoliki. Ne sikila kimiaukho kimikali kiamila mu kanisa eya Katoliki, kimikali kiasuta bibiindu bibiipa kimienya kiacha nabio.

Bakali mu miaukho bakhayila khu biindu ebino mu khuloma bali:

1. Daudi aabirumikhira. Eline lili nende bung’ali, ne kakhali khukhoya khwakhebulila khuli Daudi amenya aasi we lilaka liliindi ne efwe aasi we liliindi. Se khunyala khwakhola niko Daudi aakhola khubela busa bali aakhola tawe. Kaaba ne khwenya khukhola niko aakhola khukhwola khuche Yerusalemu lulala khu mwaka mala khuaane bisakhilo bie chisaang’i, ne kakaandi. Khebulila muli abo bachichanga khu Daudi nio barumikhire bibiipa kimienya bamuchichangakho khu likhuwa lienelio liong’ene, nende abundi bibiindu bibiindi bikekhe biri, ne se benya ako koosi niko Daudi aaba nako tawe. Ne, soma Yoana 1:17, 2 Bakorinjo 3, Baeburania 10:9, ne kamaandike kakaandi.

2. Balomanga bali e Bibilia se khukaania khurumikhira bibiipa kimienya tawe. Ne kakhaba kario, e Bibilia se khuboolela eli khukhaba nende bibiindu bikali biise bie khusaaya tawe. Ne kakhali ekhuboolela ebio nibio khukhwola khube nabio. Lundi ekhuboolela eli khwimbe, (Baefeso 5:19). Lilenelio lirusiao sisiindu sisiindi sisi sisi.

3. Balomanga bali mbao siibi ne bibiindu bibiipa kimienya tawe. Se khunyala khwaba nende siibi sisi sisi ne khuba nende bibiipa kimienya mu chingo, mu biselelo, mu khoyo chichabukhana, ne mu makhuwa kakaandi nga ako tawe. Ne kakhali, khusaaya khwabukhana. Lilaba liibi ne khutuba bibiindu ebino mu khusaaya ne mala Omwami se kakhuboolele khukhole khurio tawe (Lifunulwa khu Yoana 22:18, 19).

4. Balomanga bali bibiindu bibiipa kimienya bikhuyeeta khusaaya. Kaaba kario, siina sisiakila Omwami aaloba khukhuboolela tawe? Ese muboolela ndi se biyeeta tawe ne kakhali bikhohwa khuba sitonyi sie lisaaya biise nibio birumikhira. Ne aba kamaandike se kaloondibwe tawe.

5. Balomanga bali khukhabe nende khukhwimba mwikulu. Kamaandike se kasomiakho kali khukhwimba khwe mwikulu khuli nende bibiipa kimienya tawe. Ne kakhaba abaanga bali kaboola kario, elio se likila efwe khwabirumikhira tawe. Mwikulu khulibaamo nende bibiindu bikali nibio khukhanyala khwarumikhira mu khusaaya biise ebino tawe.

6. Balomanga bali basiima khukhwimba alala nende bibiipa kimienya. Yee, bulayi. Ese nasiima e soda nende e keki po. Ne, elio liekesia mbo nyala nabirumikhira mu khusaaya? Lirebo se likhoya khuba kaaba efwe ne khwasii-ma tawe, ne kakhali kaaba Omwami nasiimisibwa.

Nono, ne khwebuusia alala e ndaalo eye ebweeni eye lichuuma khusaaya, khukhwola khufumie Omwami mu khwimba. Elino likholwe mu roho ne mu bung'ali. Khwako, khukhwola khwimbe ne kamebaasio lundi nende mu bulungu bwe kimiooyo. Khukhwola lundi khukhwimba okhwo khuloondekhane nende kamaandike, ne elio lili khufumia Omwami khubirira mu khwimba ne kimimilo kiefwe kiong'ene. Ne, se lili liong'ene tawe. Kimienya nikio khwimba khukhwola kibe kiloonda kamaandike ne lundi kibe kia roho.

E Bibilia esomia eli boosi babebuusia khukhwola bembe. Fweesi khure alala kimimilo kiefwe mu khwimba kimienya ne chinyimbo chindakatifu, chinyimbo chifumia Wele. Khubirira mu nyimbo echino, khufumia Wele, khusomesiana, khwoombakhana, ne lundi khuchuubana khube basuubilwa khu Mwami. Buli bulayi po ne khwimba kimienya nga ekio, eno ne khukhananisibwakho namwe khuyokesibwakho nende luyoka lwe bibiindu bibiipa kimienya tawe. Kha khube busa ne liiria, kumuleembe nende likwalaalala lie kimiooyo kiefwe. Khusute fweesi kimimilo kiefwe mala khufumisilie alala Wele owe mwikulu. Siina sinyala siaba silayi khutumakho? Siina sinyala sia-suta kimiooyo kiefwe angaaki khutumakho? Elino nilio Wele enya.

KAMAREBO

1. E dini eye Bukristo eli dini siina?

2. Somakho kamaandike malala mu Ndakaano Embia kasomia khuloondekhana ne khukhwimba.

3. Kalikhoo mu maaandike akano ako kasomia kali khunyala khwarumikhira bibiindu bibiipa kimienya?

4. Boola kamakhabi kabili ke khukhwimba kali malala siina.
5. Khukhwimba khwe kumumilo nikhwo khulala siina?
6. Boola mu buleeyi khukhwimba khwe khurumikhira bibiipa kimienya nikhwo khulala siina.
7. Wele enya khumufumie khuriena?
8. Aana kamasina ka balalakho khu bekisia be dini babaamanyikha baba-loba bibiindu bibiipa kimienya mu khusaaya.
9. Khukhwimba ne bibiindu bibiipa kimienya khwarakikhila waena?
10. Kamayiingano malala niko babaandu barusianga khuyeeta khurumikhira bibiipa kimienya mu khusaaya kali siina?
11. Siina sikila ne khukhanyala khwacha khu Daudi nio khunyoole sifuno sie khurumikhira bibiipa kimienya tawe?
12. Lilala siina lirusia bibiipa kimienya mu khusaaya?
13. Khunyala khwaba ne kimienya kikiembwa alala ne bibiipa kimienya mu chingo?
14. Kaaba ne khunyala khwaba ne nakio, aba likhwekesia mbo khunyala khwaba ne nakio mu khusaaya khwosi?
15. Soma Lifunulwa khu Yoana 22:18, 19.
16. Khuliba nende khukhwimba ne khurumikhira bibiipa kimienya mwi-kulu?
17. Wele anyala afukiilila nisio khutasa mu khusaaya khubela khwasisii-ma?
18. Wele enya khukhwimba khwa lukano siina?
19. Khukhwimba khwa boosi babebuusisie nikhwo khulala siina?
20. Aanakho bifuno bie khukhwimba.

LISOMO LIE LIKHUMI NA NDALA LILIKOLOOYA LIO MWAMI

Sitonyi sisiindi sie khusaaya sili lilikolooya lio Mwami. Kristo aamanya ali omundu ali ne kibilisi. Khwako, enya alekhe enyuma sisiindu siicha khukila omundu akhebulile. Sisiindu sikhebusia esino sili lilikolooya lio Mwami.

Ne khukheseenda tawe, lekha khubone nga ne lianjisibwa. Khuche fweesi mu Matayo 26:26-28: “Nga baba ne balikho balia, Yesu abukula kumukaati apila Wele orio, akumesulamo mala aelesia babeeka bewe, mala ababoolela ali, ‘Bukula mulie, kuno kuli kumubili kwase’. Lundi abukula sikoombe, oli amala khu khupila Wele orio, aabaelesia, naloma ali, ‘Khe munywe mweesi; kano kamafuki kase ke ndakaano, kachukhwa sikila babaandu bakali khulwe khubabeela bubwooni’.” Nosiima bona busa nga lili liliaangu khukhola. Kristo aboola ali kumukaati kucha khwimeelela kumubili kwewe ne nono ne kuliibwa, kumubili kwewe kukhebulilwe. Khuloondakho, aaloma ali sikoombe, namwe kamatunda ke kumusabibu, kacha khwimeelela kamafuki kewe, ne nono ne sinywebwa, khukhwola khukhebulile kamafuki kewe. Mungila ekiindi, Kristo se enya babeeka bewe bebilile sisaakhilo sicha khurusibwa khumusalaba khubela nibo tawe. Nono, ne balia kumukaati nende khunywa sikoombe buli e ndaalo eyo Mwami mu khukhebulila kumubili kwewe nende kamafuki kewe, likhuwa elino lirama mu mebaasio kabwe. Se bebilila tawe.

Ne khucha mu 1 Bakorinjo 11:20-29, khunyoora mbo Paulo aandikila basiime be bu Korinjo ali, “Ne mwakaanana, se sili siakhulia sie lilikolooya lio Mwami nisio mulichanga tawe. Sikila ne mulia, buli sia mulala achiilililanga ne siakhulia siewe omwene, khwako balala bali ne njala ne babaandi bameela. Se muli ne chingo chenywe nicho muliilamo ne khunywa tawe? Namwe mwenya mulekelesie e kanisa eya Wele ne khuambia chisoni abo bakhenyalila tawe? Mwenya ese muboolele enywe ndi siina khu kano? Mwenya mufumie enywe? Ng’ali se nyala nakhola ndio tawe! Sikila nanyoola khukhwama khu Mwami liliekisia nilio namuboolele enywe, ndi siilo nisio Omwami Yesu aachaamwa, aabukula kumukaati, aakhupila Wele orio, aakumesulamo, aaloma ali, “Bukula. Khemulie. Kuno kuli kumubili kwase kuuli khupisibwa siibi khulwe enywe. Khola akano mu khukhebulila ese.” Mungila ng’eneyo, enyuma we siakhulia abukula sikoombe, aaloma ali, “Sikoombe esino sili e ndakaano embia, eyichusiibwe khubirira mu mafuki kase. Mu siise esio nisio munywamo, khola muri khu khuukhebulila ese.” Sikila buli lwoosi ne mulia kumukaati okuno lundi ne munywa mu sikoombe esino mwilwachanga lif-

wa lio Mwami khukhwola nga akheeche. Khwako, omundu yesi yesi nalia kumukaati kwo Mwami, namwe nanywa mu sikoombe siewe mu ngila eye khulekha khumuria tawe, aba aakholeele bubwooni kumubili ne kamafuki ko Mwami. Nono, buli mundu akhoyeele anyoe emenieelesie omwene, nio alie kumukaati ne khunywa mu sikoombe sio Mwami. Sikila aaba bali omundu sanyala amanya nilio kumubili kwo Mwami kwekesia tawe, nga alia kumukaati ne khunywa mu sikoombe, aba ereerera omwene bukhalaki nga nalia ne khunywa.” Mu khurakikha Paulo arafwire basiime be bu Korinjo khubela engila niyo abeele babukulilamo lilikolooya lio Mwami. Bukhalilia mungila niio Omwami aaboola tawe, baba bakalukhasie lilikolooya elino khuba biise bie khulia ne khusiimbwa alala nende khunywa khukhwola khumeela. Se lienyebwa khuba lirio tawe. Achiililila khubeekesia sifuno sialio nende engila eye khulilia. Paulo lundi abakhebusia ali anyoola akano koosi khukhwama khu Mwami, ne mala ekisia ali:

1. Omwami aanjisia lilikolooya elino siilo nisio aachaamwa.

2. Ekisia ali kumukaati kwaba kubakhebusia kumubili kuucha khupisibwa siibi khubela nibo.

3. Lundi aabukula sikoombe mala aabekesia nga bakhoya banywemo mu khukhebulila kamafuki kewe.

4. Buli nga lilikolooya elino ne lilibwa, lifwa liewe lilwachibwa khukhwola nga akheeche.

5. Abo balia lilikolooya elino mu khulekha khumuria aba bakholeele bubwooni kumubili ne kamafuki ko Mwami.

6. Buli sia mulala khukhwola anyoe emenieelesie nio alie lilikolooya elino.

7. Abo balia mu khuloba khumuria aba bereerera babeene bukhalaki.

Akano niko kamaboofu niko Paulo alikho aboola, ne buli bulayi khwakaloleelesiamo lukali.

Ne khuchiililila, khubona kamakhuwa akano:

1. Omwami salikho aboola ali sikoombe silala siong'ene nisio sinyala siarumikhilwa tawe. Biise bilala, bipupu bimuufu bibasianga bili sikoombe silala siong'ene nisio sirumikha, ne nono boosi bamala banywa khukhwama mu sikoombe silala esio. Omwami aaba alomaloma khu esio siili mu sikoombe, ne se sili sikoombe sisiene tawe. Nono, esiesio sili mu sikoombe siakharebwa mu bikoombe bikali sirama busa esio, ne liboofu lili khunywa mu khukhebulila kamafuki ka Kristo. Yabaa lulala, omundu mulala kacha khubukaana mu sipupu sikenisi siasuubila sili sikoombe sikhoya khuba silala. Biise ne biola mala sikoombe esio siamwoolela, anywa buli sisiabamo amalamo sio. Babaandi balomana, bali kabamaliile, ne nono baramire bal-

anywa siina. Naye abakhebusia ali Omwami aboola ali, “Enywe nywa bioosi bilimo”. Eline likhwekesia busa nga babaandu balala ne batibanga khubela busa sikoombe. Lili ng’ali mbo ne khurumikhira sikoombe silala aba se khwafunile kamaandike tawe. Ne kakhali, khubela kamalwale, buli bulayi buli mundu abe ne sikoombe siewe.

2. Khurusiakho khukhebulila kumubili nende kamafuki ka Kristo biise nibio khulia lilikolooya lio Mwami, elino liekesia ne khukhebusia buli mundu obona lili abo balikho ne balia basuubila mu liicha lio Mwami lie khabili. Abanga se kali kario tawe, andi se balia ta.

3. Biise bie khulia lilikolooya lio Mwami bili biise bilayi nibio omundu ali ne nabio bie khukhwimenieesia mala aloleelele mu limenya nilio amenyile mwichuuma libirire, namwe kamachuuma kabirire kaaba nakhabechanga omusuubilwa mu khwakaanana ne babandi tawe. Emenieesia khubona kumwoyo kwewe kuli kuriena. Nanyoola mbo amenyile mwisuubila khu Mwami bulayi, kane ache mala alie lilikolooya elino. Ne, nanyoola mbo bubwooni buli mu limenya liewe, khukhwola anyoe akaluukhane mala eng’oone nio alie. Ne kakhali kario tawe, akhalia ta.

4. Omundu nalekha khukhwimenieesia mala nalia busa lilikolooya lio Mwami mukhulekha khumuria ta, aba lili mbo, bukhalia ne khunywa mu khwenya anyoole buonia bwa mindali tawe, alia mu khwereerera bukhalki bwa mindali. Lili ng’ali mbo mbao omundu omwichefu tawe ne fweesi khuli babooni. Ne, Omwami aamanya ali se khuli babechufu tawe, ne mbo, ne khukhaka nga ne khunyala khuba balayi, aba khwakholile nga ne khunyala. Nono aba ne khulie. Omundu naye, owenya busa, lundi bukhenana tawe, khukhola bubwooni, se enyekha alia lilikolooya lio Mwami tawe. Nalia aba atibile, ne lundi aba alikho ebea omwene nende babaandi ali ali busa bulayi. Ne, Omwami amanyile. Lekha eng’oone, aluungikhe limenya liewe mala alie mu ngila eyenyekha, mu roho nende mu khuloondekhana ne kamaandike.

5. Se khwenyebwa khwaba babaandu khukhalakila babaandi mala khukhwola khube busa nende abaabo nibo khubona khuli benyebwa khulia tawe. Kamaandike kaboola kali khukhwola omundu omwene emenieesie. Omundu okhali owe kanisa tawe ne kechukhana kalia lilikolooya lio Mwami, khukhesiindukha khwema emaru tawe. Ne kane amanye bung’ali, abuundi alaria Wele mala abe mulala khu kanisa. Ne efwe ne khuloba khumulekhuula alie, abuundi salicha arie Wele tawe.

Mu khumaliilisia, mu Barumwa 20:7, khusoma nga Bakristo bataayi ne bakaanana khu ndaalo eye ebweeni eye lichuuma khulia lilikolooya lio Mwami. Khwako, khukhwola fwesi khukhole khurio. Ne, khu ndaalo siina

eye ebweeni eye lichuuma? Buli khu ndaalo eye ebweeni eya buli lichuuma. Naanu owakhuelesia ewe, namwe ese, namwe omundu okundi bunyali bwe khuraa e ndaalo eye ebweeni eye lichuuma nasilebe nga niyo Endaalo eyo Mwami, ne mbo khu niio, khwenyebwa khulilakho lilikolooya lio Mwami? Salio omundu oli ne bunyali obwo tawe. Khwako, khulekhe likhuwa elino nga Wele ne aalilekha. Lekha babaandu bewe bebuusie khu ndaalo eye ebweeni eye lichuuma mala bamusaaye, ne mu khusaaya okhuno, balie lilikolooya lio Mwami.

KAMAREBO

1. Naanu owanjisia lilikolooya lio Mwami?
2. Soma Matayo 26:26-28.
3. Siina sikila khulie kumukaati?
4. Kamatunda ke kumusabibu kemelela siina?
5. Babeeka benyebwa balie lilikolooya lio Mwami buli biise siina?
6. Soma 1 Bakorinjo 11:20-29.
7. Basiime be bu Korinjo bakholanga siina mu likolooya lio Mwami?
8. Paulo aakhola ariena khu likhuwa elino?
9. Paulo aamia waena kamekisisio kewe khu likolooya lio Mwami?
10. Boola mu buleeyi nga lifwa lio Mwami ne lilwachibwa khukhwola nga ne echa lundi khubirira mu khulia lilikolooya lio Mwami.
11. Siina siliekholekha kaaba ne balia bukhaba ne liiria tawe?
12. Kamaandike kaboola mbo khurumikhire sikoombe silala siong'ene?
13. Liboofu lili khu sikoombe namwe esiesio siili mu sikoombe?
14. Lilikolooya lio Mwami nende liliicha lia Kristo lwe khabili bitiilana biriena?
15. Boolakho nga lilikolooya lio Mwami ne linyala liaba ekhabi khu Mukristo olilia.
16. Omwami enya omundu abe omwichufu nio alie lilikolooya elino?
17. Kaaba bali omundu alakholanga bubwooni mu khwenya busa, enyebwa aalia lilikolooya elino?
18. Khwenyebwa khwakania yesi yesi khuli akhalia tawe?
19. Bakristo khukhwola bakaanane ndaalo siina mala balie lilikolooya lio Mwami?
20. Omwami aakho omundu yesi yesi bunyali bwe khuraa e ndaalo eye ebweeni eye lichuuma nasilebe khuba niio eye khulilamo lilikolooya lio Mwami?

LISOMO LIE LIKHUMI NA KHABILI KHUAANA

Khumaliilisia, khwolile khu sitonyi simaliilisi sie khusaaya, ne esino sili khuaana. Kaaba bali silio nisio e Bibilia esomia, nisio esino. Ne mala, babaandu bakali se bamanyile niko e Bibilia esomia khu likhuwa elino tawe. Khwako, khwenya khubone niko kamaandike kaboola khu likhuwa elino. Kane khunyoele mu khuloleelela khu niko kamaandike malalakho kalomaloma.

Lekha khuche fwesi khu 1 Bakorinjo 16:1, 2: “Nono, khuloondekhana ne chirupia chikhoyeele khurusibwa khuyeeta babaandu ba Wele mu Buyuda, khukhwola mukhole nisio naboolela chikanisa mu Kalatia khukhola. Buli khu ndaalo eyo Mwami buli sia mulala khwinywe khukhwola are alubeka chirupia, khuloondekhana nende nisio anyoolile mu muruungo, mala muchibiikhe nio mukhenaana khubuusia chirupia ne nichile tawe.” Ne khukhaacha aleeyi tawe, lekha khuloleelesie mu maandike akano mala khubone niko omurumwa alikho alomalomakho:

1. Khuaana okhuno khwenyebwa khube khu ndaalo eye ebweeni eye lichuuma. Khubela siina? Khubela eyino niio yaba e ndaalo eye Bakristo khukhwebuusia alala mala basaaye, yaaroborwa khuba e ndaalo niio khuaana ne khubuusia biekholekhelakho. Ne khu ndaalo chichiindi? Se lilikhoo liosi liosi lilomalomakhwo khu ndaalo chichiindi tawe. Lilaka liliaanibwa mu maandike akano liboola mbo khuaana khukholwa khu ndaalo eye ebweeni eye lichuuma yong'ene. Kimikaanda kie dini kimikali kibechanga nende libuusio buli nga ne kiakaanana. Ne kaaba bali kane khuloonde kamaandike, khukhwola sikholwa esino sikholekhe khu ndaalo eya aanwa. Chikanisa cha Kristo khwako chakaananga khu ndaalo eye ebweeni eye lichuuma, ne abwenao niio abo baali babaayo benyebwanga khuaana.

2. Buli Mukristo enyebwa khuaana. Ne, elino liaba mbo ne banyoolile sisiindu mu muruungo. Omwami se arao mbo babaandu bewe baane akhaba ne bakhanyoolile sisiindu mu muruungo tawe. Ne kakhali, Omwami enya babaandu bewe baane ne kaba bali banyala, ne khuloba khukhola khurio khuli bubwooni.

3. Benyebwa bare alubeka (chirupia) khukhwama mu muruungo. Chindaa-lo echo, kumuruungo kwa kholwanga mu biindu nga bibiaayo, bibiindu bibiama mu biruundu, ne bibiindi. Aluno ari, khaananga chirupia khubela babaandu bakali bakusianga nibio banyoolile mala banyoola chirupia, namwe barungwangwa chirupia buli lichuuma. Kakhaba kario, esio silaanwa siloondekhana nende abuundu niio siaanibwa, babaandu balikho ne baana,

nende malala siina kalio biise bie khuana okhwo. Nono, chinyala khuba chirupia namwe bibiindu bibiindi.

4. Benyebwa baane nga kumuruungo kwabe ne kubele. Khuaana khwabwe khwaloondekhana nende nisio banyoolile mu muruungo. Ne, benyebwa baane sitonyi siina sie ku muruungo kwabwe? Nisio baana siaba busa nga ne benyile, ne elio lisilio aluno ari. E Ndakaano Embia se somiakho kamakhuwa ke khuaana sitonyi silala khwikhumi tawe. Ne kakhali, khunyala khuaana angaaki we sitonyi silala khwikhumi khubela khumenyile aasi we lilaka lilayi khutumakho elielio nilio Bayaudi bamenyao, liliaba mbo nibo baane sitonyi silala khwikhumi. Kaaba mbo khumenyile aasi we lilaka lilayi khutumakho, lisuubisia lilayi khutumakho nende lilieyikina lilayi khutumakho, siina sikila khulobe khuaana lukali khutumakho? Ndabonaanga eno, mu Asia, mbo buli mundu enya khuaana, ne kakhali, baana bititi po. Biise bilala, balala baba baanile nga ne banyala, ne biise bikali, nibio bakali babwe baana bili asi we bunyali bwabwe. Lundi ndabonaanga mbo babaandu ba Asia abano bali ne chirupia che khurumikhira khu binema, che khukula endaba, nende khurumikhira khu biindu bibiindi bikali. Mbona mbo babaandu abano bali be sibala. Kaaba ne bali ne chirupia che khurumikhira khu biindu ebino, enywe nanywe murumikhiranga chirupia chenywe khu biindu siina? Mwesi munyala khuba ne murumikhiranga chirupia chenywe khu biindu ebino namwe bibifwaana. Yee, akhaba ano, khunyala khwatumakho nga ne khulakholanga. Omwami aboola ali khuaane nga ne khunyoolile mu muruungo. Ewe wamwene omanyile nga ne oruungibwe ne wenyebwa khurusia sikelo siina. Biise bikali, olabona mbo wenyebwa khurusia chinoti, se chili chinyangala tawe. Biise bibiindi, balala khwinywe munyala khuaana chinoti chingali khutumakho nga ne mwibaasia. Yee, se nyala na mu-boolela siina nisio mwenyebwa khuaana tawe, nga busa mwesi ne mukhanyala mwamboolela siina nisio mbaana tawe. Ne kakhali, Omwami amanyile nisio khwenyebwa khuaane, ne, nono ebino nibio biise bie khurakikha khuaana nga ne lienyebwa. Namwe?

5. Benyebwa baane mala babiikhe nio bakhenaana khubuusia ne kechile tawe. Mungila ekiindi, ne bakhola nga ne ababooleele, biise nibio keechela, buli siindu aba sialindiliile busa, ne nono, aba nisio baanile esio kanyalikhana mbo sianje khurumikhirwa khu likhuwa lilio elio bukhatibia biise tawe. Elinio lilio akhaba aluno ari. Kaaba ne khulaana nga Omwami ne enya ali khuaane, kane khube nende chirupia chinyala chayeeta kimilimo kio Mwami khukholwa. Mu sibala sie dini, chikanisa chingali se chikholanga chirio tawe ne nono chamenyela khusaba chirupia buli khase. Bukhaana babeene tawe, baruranga ne bacha mu sibala khusaba buyeeti. Chindala chikhola bukhala

bwe khukusia kamakaseti namwe bitabu. Chichiindi chili nende kiminaanda nimwo chikusilia bibiindu. Chichiindi chikhola kimibayo ne babaandu baru-unga chirupia nio balole. Ne, Omwami karaao lilaka ali babaandu bewe khu-khwola baane khu nibio bali nabio, mala koosi niko e kanisa yenya khukhola kanyalikhe. Eyino niio engila eya Wele eye khukhola kimilimo kiewe ne se khunyala khwakikhola yaba endayi khutumakho tawe.

Lekha lundi khulolekho kamaandike kakaandi kaloondekhana nende khu-aana. Kanyoolekhana mu 2 Bakorinjo 9:6, 7: “Khebulila muli omundu omii-cha bumiicho bukeekhe akesa bukeekhe, ne oyo omiicha bumiicho bukali akesa bukali. Buli mulala enyekha aane nono nga ne abisiisie, akhakelao esonia tawe, namwe akhaana sikila enyekha khukhola ario tawe, sikila Wele asiima omundu oanilanga mu busangaafu.”

1. Aboola ali khukesa khuloondekhananga nende khumiicha khwefwe. Ne khumiicha bukeekhe, khukesa bukeekhe. Ne khumiicha bukali, khukesa bukali. Eline lili lia ng’ali mu bulimi, bukhala nende mu buli siindu mu limenya. Lili lia ng’ali mu milimo kio Mwami kiosi. Nga ne khura bikali mu milimo ekino, bili bikali bilamamo. Sifuno sikilanga babaandu bakali ne bakhanyoolangamo sisiindu tawe sili mbo se barechangamo sisiindu ta. Son-yala wamianga sisiindu mu kanisa ne mala so aanangamo tawe ta. Ndi nende buuri mbo bakali khwifwe se khusubila Omwami khukhwola khukhola nga naboola tawe. Ne kakhali, lekha khumukhake. Khwamala khwakhaka, khulanyoola khuli buli bung’ali mbo nga ne khuaana lukali, bili bikali nibio khulanyoola.

2. Aboola ali buli mulala enyekha aane nono nga ne abisiisie. Ne khu-khebuusia alala khusaaya tawe, khwenyebwa khube ne khubisiisie khale si-ina nisio khucha khuaana. Eline nilio alikho alomalomakho ano. Okhaliinda khukhwola biise bie khuaana nio wanje khukhwibaasia ne khueenja siina nisio olara mu sikono sie khubuusia tawe. Khonyoe omanyenja siina nisio ola aana khuloondekhana nende nisio onyala khuaana mala oane.

3. Aboola ali khukhaana mu khwesonia tawe. Lili mbo okhaana mu kh-weulila oli bakhuyiikile namwe bakhumiinile tawe. Ewe no aana mala se wenyile oane tawe khubela oli ne bumiinifu bwe khurumikhira khu siindu sisiindi, khuaana khwoo khuli khwa busa mu moni chowo nende cha Wele.

4. Aboola ali omundu akhaana sikila enyekha khukhola ario tawe. Omwa-mi se alikho akhuyikiilisia oane mala se wenya tawe ta. Sakhuyikiilisiakho tawe.

5. Ne kakhali, aboola ali Wele asiima omundu oanilanga mu busangaafu. Wele enya oane oriena? Enya oane ne busangaafu, khubela wenya oane, ne

lundi obe omusangaafu sikila wanyalile khukhola orio. Khwenyebwa khube abo baana mungila eyino.

Mukhumaliilisia, kha khukhebulile mbo Omwami omwene aaloma ali, “Chikhabi chingali chili mu khuaana khukhila mu khwakaanila.” (Barumwa 20:35). Ndi ne buuri mbo bakali khwifwe khwakaluukhasia likhuwa elino khuba mbo, “Chikhabi chingali chili mu khwakaanila khukhila mu khuaana.” Khubela siina? Khubela bakali khwifwe khuli ne kumuliungo, chiinge nende libuba, ne khwako khunuulanga Wele esio siili sisiewe mu bung’ali. Khusabe Wele akhuyeete khwinyokhe khukhwama mwilo elino mala khwanje khumukoboselia sikelo sili sisiewe ne khukhasinyoola mu makhono kefwetawe. Se khuliba Bakristo nga ne khwenyebwa khuba tawe khukhwola nga ne khulamanya khuaana nga kamaandike ne kaboola kali khuaane.

KAMAREBO

1. E Bibilia esomiakho khuaana ku?
2. Babaandu bakali baananga nga ne benyekha khuaana?
3. Soma 1 Bakorinjo 16:1, 2.
4. Aana e ndaalo niio Bakristo benyekha khukhwebuusia alala mala baane.
5. Lilikhoo lilomwakho khuloondekhana nende khuaana mu chindaalo chichiindi?
6. Kimikaanda kie dini kiebuusianga alala khubuusia nisio baana kiriena?
7. Bakristo boosi babebuusisie benyebwa khuaana?
8. Kaba kariena kaaba bali balala se banyalile khuaana tawe?
9. Omwami enya babaandu bewe baane akhaba ne bakhanyoolilekho siosi siosi mu muruungo mwichuuma libirire tawe?
10. Omwami enya babaandu bewe baane kaaba bali banyoolilekho mu muruungo mwichuuma libirire?
11. Benyebwa baane siina?
12. Benyebwa baane sikelo siina?
13. E Ndakaano Embia esomia khuaana sitonyi silala khwikhumi?
14. Siina sikila ne khwenyebwa khuaana khutuma sitonyi silala khwikhumi?
15. Babaandu babechanga nende chirupia chicholaana bibiindu nibio benya ku?
16. Siina sikila ne khukhaananga situmakho nisio khuaananga khu Mwami tawe?
17. Boolakho mu buleeyi sikila Bakristo ne benyekha khuaana.
18. Kimikaanda kimikali kie dini kinyoolanga chirupia che khurumikhira

kiriena?

19. Ne, elino nilio Omwami enya babaandu bewe bakhole?

20. Soma 2 Bakorinjo 9:6,7.

21. Boolakho mu buleeyi niko elomo eye khumiicha nende khukesa eloma.

22. Siina sikila bakali khwifwe ne khukhakesa bikali tawe?

23. Khuaana nga ne khunyoolile mu muruungo nisio siina?

24. Omwami enya khuaane mu khwesonia namwe khubela khwenyekha khukhola khurio? Balaayiakho.

25. Omwami asiima omuaani owa lukano siina?

26. Naanu owaloma ali, “Chikhabi chingali chili mu khuaana khukhila mu khwakaanila.”?

27. Boolakho mu buleeyi nga Bakristo bakali ne bali e lubeka lwe khuaana.

LISOMO LIE LIKHUMI NE KHATARU KHUUCHA MU LIAKAANANA

Khu makoso koosi niko Omukristo anyala akhola, lilalakho libeelesia lukali lili khulekha khuucha mu liakaanana. Omundu anyala ariena aaba nende lilieyikina lie khuuba omusuubilwa khu Mwami eno nakhali ne liiria khu Niye likila ache mu liakaanana ne basiime babaandi tawe? Likhuwa lili busa mbo se anyala aaba omusuubilwa aba tawe.

Bakali mu miaukho bachichaanga mu liakaanana khusaaya khabili khu mwaka---mu Krisimasi nende mu Pasaka, ne mala chi naikara echino choombi se chinyoolekha mu maandike tawe. Ne mala khuli nende babaandu bakali po babeebea mu khwibaasia bali khuucha mu naikara echino khwong'ene khusiimisia Omwami. Bebaasia bali Omwami naanu niye? Ne khwicha khu Bakristo bakali, baali be luuya lwo Omwami, se bachichaanga mu liakaanana buli nga ne lienyebwa tawe. Bali ne bikila bie khukhwekanyiilisia buli lwoosi. Balala baloma bali kimilimo kiabwe kibekayiile namwe lukeendo lwe khuucha sia liakaanana luli luleeyi lukali. Bali elino, namwe elio, namwe sifuno nasilebe. Lirebo lili mbo: Omwami alifukiilila bikila ebino? Babaandu abo ano baloma bali Bakristo nibo, ne se bacha mu liakaanana khusaaya tawe. Lubeka luluundi, banyala busa bachiililila nende nibio beenya khukhola, namwe bechiile busa khu milimo kiabwe bukhaleelelela khu lukeendo tawe, namwe bekholele bibiindu bibiindi busa, ne liliakaanana nalio lilume.

Balala khwabo balekhanga khukhwebuusia alala balomanga bali: "Ese sabilanga engo." Eline lilaba busa lilayi kaaba bali lili nilio Omwami enya khukhole. Ne kakhali, Omwami akhuboolela bulayi ali enya babaandu bewe bebuusie alala khu ndaalo eye ebweeni eye lichuuma. Mala ne bakholile bario, benyebwa babe ne lisaba, beyike likhuwa liewe, beembe, balie lilikolooya lio Mwami, mala baane khu nibio bali nabio. Khureba abo basaayilanga engo khuli, muaananga khu naanu? Mulichanga lilikolooya lio Mwami? Ta, ndi ne lisuubila mbo bakali khu baandu nga abo bakamanga khu lisaba liong'ene mu khusaaya khwabwe, manya abuundi ne benaananga. Benyebwa bekisibwe mbo khusaaya Wele se khuli busa khumusaba khwong'ene tawe. Kalio kakaandi kakenyebwa khukholwa.

Buli bung'ali mbo bibechangao biise nibio Bakristo, bukhali mu khwenya khwabwe tawe, bakhilwanga khuucha mu liakaanana. Bulwale ne bibiindu bibiindi bikali binyala khubekayila. Anaano, omundu se enaana khuaana sikila nakhachiile mu liakaanana tawe khubela ali khale nende esiesio simwikayile. Lundi, Omwami alafukiilila sikila sikholelele omundu alekhe khuucha mu

liakaanana ne kakhali se alafukiilila sikila sie khukhwekanyiilisia tawe.

Lekha nono khulole khu elio nilio likhuwa lia Wele liboola khuloondekhana nende khuucha mu liakaanana. Omuandiki owe Baeburania aloma ali: “Lekha khwiandalasilie elala mu lieyikina nilio khwiyamanga, sikila khwi-yikina khuli Wele alakhola niko akhusuubisie efwe. Lekha khuechane kimiooyo fwabene khu fwabene, khuyeetane fwabene khu fwabene, khube ne busiime ne khukhola kamalayi. Khukhalekha kumwiima kwe khukhwakaanana alala nga balala ne balikho ne bakhola tawe. Ne kakhali, lekha khutase khutinyilisiana, nga ne khubona khuli E Ndaalo eyo Omwami elikho yimbiya. Sikila embosio ekiindi yosi yosi erusiao bubwooni se elikhoo kaaba bali mwenyelamo khu chiililila khukhola bubwooni enyuma we khuboolelwa bung’ali tawe. Ne kakhali, siramireo sili khulindiilila mu buri liliicha lie likhalaka ne kumulilo kumurafu kulibunia abo bayingania Wele.” (Baeburania 10:23-27). Nono, lekha khulole khu maboofu mu akano:

1. Khukhwola khube basuubilwa mu khumanya khuli oyoyo niye khuchakho aliba omusuubilwa khwifwe.

2. Khukhwola khuchiililile mu khukholelana kamalayi buli lwoosi.

3. Khukhalekha kumwiima kwe khukhwakaanana alala tawe. Biise ebio, balala, nga busa aluno ari, abele balekhile kumwiima kwe khukhwakaanana alala, ne elio se lili nilio liliyenya lia Wele tawe.

4. Khukhwola khutase khutinyilisiana ne khuechana kamaani mbo khwakaanane alala buli nga ne lienyekha, eno nga khubona khuli e ndaalo elikho yimbiya. Ne eyino eli Endaalo eyo Omwami, e ndaalo eye khusaaya. Eline liekesia mbo khwenyekha khube ne khukierekhela. Khuli nende lichuuma liosi khukhwerekekha, buli lichuuma.

5. Khukhwola khukhebulile khuli embosio ekiindi erusiao bubwooni se elikhoo tawe kaaba bali khuchiililila khukhola bubwooni enyuma we khuboolelwa bung’ali, ne kakhali siramireo sili khulindiilila liliicha lie likhalaka ne khubona. Lili mbo, ne khulekha mu khwenya khuucha mu liakaanana mala khukhole bibiindu nibio khumanyile khuli khwenyekha, Omwami anyala akhuonia ariena ne mala aba khwamulobile? Khwako, khulatiba ne kaba bali khulachiililila khumenya khurio.

Akano koosi kakhuboolela kali Omwami enya khuche mu liakaanana lie kanisa buli lwoosi, ne elino lili likhuwa likhali lie kumusilisili tawe, ne lundi, linyala liakhubunia khwalekha khulikhola. Ne, siina sikila Omwami ne enya khukhole khurio? Siina sikila khuche mu liakaanana? Khuli ne bifuno bikali bikila khukhole khurio. Lekha khubonekho bilala:

1. Khubela khusomesebwa khukhola khurio nende likhuwa nilio khue-

lesebwe nga lilaka. Lundi khuloleelela khu niko bataayi bakhola. Khwama khusoma mu Baeburania 10:25 niio khukambilwa mbo khukhalekha kumwiima kwe khukhwakaanana alala tawe. Ne lundi khusoma mu Barumwa 2:42 nga Bakristo bataayi ne bakaanana khusaaya, ne lundi mu Barumwa 20:7 niio Paulo nende Bakristo e Turoa bakaanana e ndaalo eye ebweeni eye lichuuma khusaaya. Nono fwesi khukhwola khukhole khurio.

2. Khucha mu liakaanana khusaaya Wele. Kristo akhuboolela mu Yoana 4:23, 24 ali Wele aenja abo bali ba ng'ali bamusaaye, ne lundi Wele ali Roho ne efwe khukhwola khumusaaye mu roho ne mu bung'ali.

3. Omwami enya efwe khuche mu liakaanana nio khumukhebulile mu khulia lilikolooya lio Mwami. Paulo, nalomaloma khu lirakikha lie lilikolooya lio Mwami ekesia ali kumukaati khukhwola kulibwe mu khu khebulila kumubili kwa Kristo, ne sikoombe sinywebwe mu khu khebulila kamafuki ka Kristo (1 Bakorinjo 11:24, 25). Khunyala khwakhebulila Omwami mungila niio enya khumukhebulilemo khuriena kaaba bali se khwakaanana alala e ndaalo eye ebweeni eye lichuuma khukhole khurio tawe?

4. Khucha mu liakaanana nio khuaane khu nibio khunyoolile mu murungo. Lundi ne khucha mu 1 Bakorinjo 16:2, khunyoola Paulo aloma ali khukhwola khwakaanane khu ndaalo eye ebweeni eye lichuuma nio khuaane khu nibio khunyoolile mu murungo. Ne khulekha khuucha mu liakaanana, nibio khwakharusisie bicha waena? Khunyala khwaana e ndaalo eye ebweeni eye lichuuma liloondakho. Eline khukhoya khukhola kaaba bali khwakhilwa khukhwakaanana khubela bulwale nende bibiindu bibiindi bifukiililwa. Bakali bakhachichanga mu liakaanana tawe se banyoolanga bubweyaangu bwe khuaana tawe, ne lundi se lili liong'ene ta, ne kakhali bachiilililanga khulekha khukhwakaanana ne khuaana buusa bukhaba ne lilienaana khu likhuwa elino tawe.

5. Omwami akhulaka ali kane abe nafwe mu liakaanana liefwe. Rekeeresia nga ne akhulaka: "Sikila niio babili namwe bataru bebuusisie mwisina liase, aba ndi nabo abwenao." (Matayo 18:20). Eline liong'ene likhoya likhukhole khwenye khuucha mu buli liakaanana lie kanisa khubela Omwami alakiilisia ali kane abemo. Se khwekoomba khuucha mu liakaanana kaaba bali omurumikhi omukhongo owe buruki bwe musibala namwe omukhongo okundi alimo ku? Ne ano Omwami omwene aloma ali kane kakaanane nafwe---se luli lulala tawe ne kakhali buli lwoosi. Ng'ali se khunyala khwenya khulekha khuucha niio Omwami aaboola ali alaba tawe.

6. Khukhwola khwenye khuba mu buli liakaanana khubela sifwaani nisio aba khulikho khuaana. Be khu luuya lwefwe nibo khwasiima, basaale nende

babaandu be musibala bakhuloleelele. Bakhulola efwe banyoole nisio balolelakho, banyoole likeleka. Lienyakha khumanye likhuwa elino mala khukhake nga ne khunyala khubekesia ne khubayiilila khu ngila endayi. Buonia bwabwe bunyala khuba ne bucha khukhwamanana khu bikholwa biefwe lukali po, ne abundi se khwamanyile khurio tawe. Paulo aandikila Batesalonike: “Mwaba babeeka befwe lundi bo Omwami, ne akhaba ne mwaba mu sinyasio sikali, mwakaanila burume ne liliekhoya liliama khu Roho Omutakatifu. Khwako, mwaba be khulolelakho khu basuubili boosi mu Masedonia ne mu Akaya.” (1 Batesalonike 1:6,7). Koo, khunyala khwaba abo nibo babaandu balolelakho, mbo ne bakhuloonda efwe, bung’ali buba mbo aba balikho baloonda Kristo? Khwenyekha khuuba. Ne lundi khukhwola kubeb. Yaanja biise ebino khukhwerekekha khuucha mu buli liakaanana, khukhwolayo mu biise bibienyekha, obe omusisi ne lundi omurekeerefu oli ne liiria, mala ng’ali osaaye Omwami.

7. Khuchichanga mu liakaanana khubela busangaanilo ne lundi nio khukhule mu roho, buli mundu nende fweesi alala. Kaaba bali efwe se khwakaanana tawe, e kanisa enyala eriena yaaba siosi siosi niio eli ao, namwe mu lukoba lwoosi? Liliakaanana ne litambao, se khunyala khwamanyana tawe, se khunyala khwamanya kamaani kefwe tawe, se khunyala khwaala kimilimo kiefwe tawe, se khunyala khwayeetana tawe, ne se khunyala khwachuubana tawe. Mu ngila ekiindi, kimilimo kimikali kie kanisa, kamaani kayo, niko enyalile khukhola, ne kakaandi koosi, kanyalikha busa khubela liliakaanana liayo. Khwaloba khukhwakaanana, e kanisa elafwa. Eline nilio likila no soma mu Ndakaano Embia mbo e kanisa yaakaananga, ne osi osi niio Paulo ne basiime babaandi bacha, bakaananga nende bipupu bibiabechangayo. Lundi khuboolelwa khuli yakhaba mu ndaalo che khukhupisibwa siibi, basuubili be kanisa banyoolanga bubweyaangu nende chingila che khukhwakaanana. Lisili busa liboofu lirio aluno ari mbo khwakaanane buli nga ne lienyekha mala kusaaye Omwami, ne lundi khukhole kimilimo kiewe.

Nono, ebino bili bilalakho khu bifuno bikila khukhwola khuche mu liakaanana lie kanisa. Ne, manya oli khuucha khwefwe mu liakaanana se khuli khwe khuchayo nga lulala khu mwesi namwe lwa nyanga tawe. Khwenyekha khucheyo buli e ndaalo eye ebweeni eye lichuuma namwe buli nga e kanisa ne yenya khwakaanane. Kamaandike kaboola kali, “Khukhalekha kumwii-ma kwe khukhwakaanana alala tawe.” Eline liekesia mbo khuche mu buli liakaanana nilio khunyala khuchaamo. Khusaba Omwami akhuyeete khunyale khuura kamaani kamakali mu kusaaya nga ne khusili ne bulamu nio khwolaane khuba basuubilwa khu niye, ne khube khuucha mu liakaanana lie

kanisa. Kaaba ne khulaba basuubilwa khu niye mungila eyino, khulaba basuubilwa mu ngila chichiindi choosi.

KAMAREBO

1. Lilala siina nilio likoso libeelesia lukali po nilio Omukristo anyala akhola?

2. Omukristo anyala aba omusuubilwa mala alekha khuucha mu liakaanana lie kanisa ku?

3. Babaandu bakali be mu miaukho bachichanga mu liakaanana khabili khu mwaka. Bibechangea biise siina?

4. Boolakho kamekanyiliso malala niko Bakristo baananga ne niko baboola bali kakilanga bakhacha mu liakaanana lie khusaaya tawe.

5. Kanyalikhana Omukristo asaayile busa engo wewe bukhacha mu liakaanana lie sipupu sie kanisa eli niio amenyile tawe?

6. Omukristo owa ng'ali anyala enya khukhola ario?

7. Biise siina nibio Omukristo anyala alekha khuucha mu liakaanana bukhakhola bubwooni tawe?

8. Boolakho mu buleeyi nga Omukristo ne anyala kakhilwa khuucha mu liakaanana bukhaha bali lili liliyenya lie tawe.

9. Soma Baeburania 10:23-27.

10. Siina sikila khwenyebwe khuba basuubilwa khu Mwami?

11. Khulekha kumwiima kwe khukhwakaanana alala nikhwo khukhola siina?

12. Bakristo banyala bakhebusiana bariena khuloondekhana nende liliakaanana basaaye?

13. Ndaalo siina elikho ne yimbiya mu Baeburania 10:25?

14. Boolakho sikhekholekhe khwabo bachiililila khukhola bubwooni ne mala baboolelwa bung'ali.

15. Aanakho bifuno bilala bikila khuche mu liakaanana lie kanisa.

16. Boolakho kamakhabi kabili niko khubona Bakristo bataayi ne bakakaanana khusaaya.

17. Sifuno sisiene sie khuucha khusaaya sili siina?

18. Khunyala khwakhebulila Kristo nga ne aakhuboolela kaaba bali khulekha khukhwakaanana?

19. Khwenyebwa khukhole khuriena nisio khwenyebwe khusaaya kaaba bali se khwanyakale khuucha mu liakaanana e ndaalo eye ebweeni eye lichuumasilebe tawe?

20. Naanu owaloma ali acha khubechanga ne nafwe mu liakaanana liefwe?
21. Omwami acha khuba nafwe biise siina?
22. Lomalomakho mu buleeyi khu buboofu bwako niko okhola mu khusaaya nga ne kali niko babaandi balolelakho.
23. Makhuwa siina kanyalikhana busa khubela liliakaanana liefwe?